

Atóá Bele Súná Yohane

¹ Íni gyí atóá Bulu léha Yesu Kristo léle súná mu asúmpú tsú tóá íbéba nke ánfuto iwí ní. Yesu lówa Bulu-òbòpú léba bele mú súná mu osúmbi Yohane. ² Yohane légyí tógyítóá olowun iwí adánsiè. Olegyi Bulu asún ámu pú asún ání Yesu Kristo lébláa mu fée iwí adánsiè ònòkwálsu. ³ Bulu obóyulá òhá ání òtekla mu ònósú òtòpú asun wanlínhé anfi súná Kristo òpasua ámu. Obóyulá ahá ání butonú asún ámu, gyi dinká mósú é; tsúfé mú fée bábi lafòn ta.

Kristo Òpasua Asienó Ámu Itsiáha

⁴⁻⁵ Mí Yohane dé òwuló ánfí wanlín sísí Kristo òpasua asienóá mlíbu Asia òmátó.

Òhá ámúú oletsiá, òbu unu, òbélaba amu mua Òhè asienó ání bulí mu owíe obíá ansító pú Yesu Kristo bogyíi mli buale, abuha mli iwilwii. Múgyí òdansiyin ònòkwálpú, ogyankpapuá òlòkusú tsú afúlito, òyító awíe féesú ogyípú.

Mutòdwé aní, òlòpú mu obugya ká aní nwunso ikò, sí aní lakpan kíe aní. ⁶ Alabwé aní mu iwíe ogyíkpa pú mu igyí ahapú ání abósum mu Sí Bulu. Numnyam múa túmi íbwéé mu klé bré fée! Amen.

⁷ Kí! Òna nwulótáaso òbá! Òhagyíòha obówun mu. Ahá ámúú bówò mu pía amu kúráá bówun mu. Mu su òyító ahá fée bósu kúklókúú. Alí íbéba ní!

⁸ Aní Wíe Bulu léblí òbéè, “Mígyí Alfa múa Omega. Otúmípu amúú oletsiá, òbu unu, òbéba amu ní.”

Kristo Le Súná

⁹ Mí, mli pío Yohane ní. Mía mlunyo dé ipian wúun Yesu pú Bulu iwíegyí ámu su, anidé íklun nya líí kínkín. Bulu asún òkanda pú Kristo iwí asúnblí su balé mí ya Patmo òpu

nsiné ɔsulɔsu. ¹⁰ Eke ɔkɔvá igyi anɪ Wíe eke á, Bulu ɔɲé léba mɪsu. Nonu ɔme ku, ɪlelin kúklókúú fé ɔkpe ɔtsáwule pé mí ɔma. ¹¹ ɔme amu ɔbéé, “Wanlun tóá fudewúun wa ɔwulótó, afupuya Kristo ɔpasua asienó, bugyi Efeso, Smirna, Pergamo, Tiatira, Sardi, Filadelfia pú Laodikea.”

¹² Bréá nedamlí mbéé anki ɔhá ání ɔde mí asún bláa a, nowun sika pepe ɔkandíe-oyíá ɪbu abámbi asienó. ¹³ ɔha ɔkɔvá ɔlelian Nyankpɔsa-Mu-Bi ámu líí ɔkandíe-oyí ámu nsiné. ɔlɔwa ligá, ɔlɔpu sika pepe ɔfé tsan mu kántó. ¹⁴ Mu nwun pú mu imi féé lofulí fé opuli mpútó ntée ɔhráda. Mu ansíbi aklambi é lɔwankí fé ogyá mpumpi. ¹⁵ Mu ayabi de ogyá kpa fé kɔ́ɔbri ání bafwí mú lé ogyátó unuɔ. Mu ɔme idetsulá fé ntsuá ɪdekpa yi. ¹⁶ ɔde ntsrakpabi asienó mu gyɔpɪtɔ. ɔdayí ɪya anyɔ kláklá ledali tsu mu ɔnótó. Mu ansító ɪhíe dɔwankí fé ɔpawi. ¹⁷ Bréá nowun mu a, nemlí bun mu ayabiasɪ fé ɔha wuhé, táme ɔlɔpu mu gyɔpɪ ɪbi dínká mísú, blí ɔbéé, “Mánya ifú! Mígyí Ogyankpapu múa ɔtráhe amu ni. ¹⁸ Mígyí ɔkiankpapu amúú nowu ámu ni. Ki, mbu nkpa bré féétó! Mbu túmi lowu múa afúlitɔsu.

¹⁹ “Wanlun tóá fawun bɔtsun, múa ɪdebá séi pú múa ɪbéba ɔma wa ɔwulú ámutɔ. ²⁰ Ntsrakpabi asienó amúú fowun mí gyɔpɪtɔ pú sika pepe ɔkandíe-oyí abámbi asienó ámu asɪ ní. Ntsrakpabi asienó ámu igyi ɔpasua asienó ámu abɔpu. ɔkandíe-oyí abámbi asienó ámu é gyí ɔpasua asienó ámu.

2

Efeso ɔpasua Nkla

¹ “Wanlun asún ánfɪ sɪsɪ Akristofɔ ɔpasua ání ɪbu Efeso wúluto ɔbɔpu fɛɛ,*

* 2:1 ɔbɔpu anfi gyí Bulu-ɔbɔpuá ɔlíí há ɔpasua ámu ni. ɪbu nfi múa 2:8, 12, 18; 3:1, 7, 14 étó.

“Ōhá ámbú ɔde ntsrakpabi asienó mu gyɔpɔtɔ, ɔna sika pɛpɛ ɔkandíe-oyí abámbi asienó ámu nsuné ámu ɔbé: ² Nyin tóá fudebwe fée. Nawun alíá fuhíé fude agyómá yɔ, pú alíá fude nsi wa líí kínkín. Nyin ání futamakle aha laláhe asún. Fakápú ahá ámbú buɔde amú iwí tí Kristo sumbí ayɔpú ámu, wun ání afunupɔ bugyi. ³ Fotomi wun ipian mí sɔ, fómeyinkí ɔma. ⁴ Táme asún kule péá mbu fú iwí gyí, ɔdwe itráa ma mía fonyɔ ntée fú fú aba nsuné fé gyankpapɔ amu. ⁵ Mú sɔ kaun alíá teki fugyi asa fadida. Damli klɔntɔ, afúlatsia fú atsiábi. Ní megyí alí á, néba beɛ fú ɔkandíe-oyí ámu lé mú aba ɔpasua atráhe amutɔ. ⁶ Táme toku kuléá ibu alé fú iwí gyí, futamakle Nikolai abúopɔ bwehé laláhe amu, fé alíá mí é ntamakle mú.

⁷ “Ōhá ání ɔbu asu onúu asun ání Ōɣe Wankíhé amu dé ɔpasua ámu bláa asi. Néha ɔhá ání olegyi isɔ obégyi Paradiso ndobítɔ oyí-abí ámbú itehá nkpa ámu.”

Smirna ɔpasua Nkla

⁸ Ōletrá bláa mí ɔbé, “Wanlun asún ánfɔ sɔsɔ Akristofɔ ɔpasua ání ibu Smirna wúlutɔ ɔbɔpɔ fɛɛ,

“Ōhá ámbú ogyi Ogyankpapɔ múa Ōtráhe, olowu lákúsú tsú afúlitɔ ámu ɔbé: ⁹ Nyin fú ipian wunhe pú ohian ání fudegyí, táme fobɔ ató! Nyin alíá ɔpasua ámbú buɔde iwí kí beɛ, Yudafo búgyi ámu buɔde afunu wa dínká fúsú. Megyí Yudafo búgyi, Ōbunsám abúopɔ ɔpasua bugyi. ¹⁰ Máha ipian ání íbéba fɔsɔ iwa fú ifú. Nde fú bláa, Ōbunsám ɔbéha békitá mlitɔ aku tswi obu. Ōbósɔ mli kí. Bédínká fúsú nke dú. Ní lowutɔ ígyi ó á, fú mú wa ɔnɔkwali. Néha fú isugyi-ɔpa, igyi nkpa ání itamatá.

¹¹ “Ōhá ání ɔbu asu onúu asun ání Ōɣe Wankíhé amu dé ɔpasua ámu bláa asi. Ōhagyíɔha ání olegyi isɔ á, lowu nyɔɔsɔ amu uméeda mu.”

Pergamo ɔpasua Nkla

¹² Ọlẹtrá bláa mi ọbée, “Wanlun asún ánfí sí sí Akristofọ ọpasua ání ibi Pergamo wúlutọ ọbọpọ fẹe,

“Ọhá á mú ọbọ ọdayí ọya anyọ kláklá ámu ọbée: ¹³ Nyin ání futsie ọtínéá Ọbunsám owíe obíá itsie, táme fude fú hógyito kínkínkín. Bréá bọmọ mí adánsie ogyípú ọnọkwalupọ Antipa mlí wá inu kúrání á, fọmekpa mí ọma. ¹⁴ Táme mú ó á, mbu fú iwí asún kpalobí kv. Mlító aku búbuo Balaam amú olosuná Balak† alíá ọbóbwe Israelfọ bóbwe lakpan, ọleha amú betsiá wá atsi múa ayin asún, tsíá gyi ọkpitọ-atọ ámu. ¹⁵ Alí kén aku búbu mlítóá búbuo Nikolai atosunáhé ni. ¹⁶ Mlídamlí kluntọ. Ní megyí alí nóbofwie mlító, pú mí ọnótọ ọdayí ámu kọ amú.

¹⁷ “Ọhá ání ọbọ asu onúu asún ání Ọje Wankíhé amu dé ọpasua ámu bláa así.

“Ọhagyíha ání olegyi isu obégyi atogyihe amú bọpọhín ámu kv. Nétrá ha okugyíọku ibwi futútúá bọwanlín idá pọpwe dínká músú. Mu nkule ọbébi dá ámu. Ọhaa méebi mú tsía mutọ.”

Tiatira Ọpasua Nkla

¹⁸ Ọlẹtrá bláa mi ọbée, “Wanlun asún ánfí sí sí Akristofọ ọpasua ání ibi Tiatira wúlutọ ọbọpọ fẹe,

“Bulu mu Bi amú mu ansíbi igyi fé ogyá ọdandọ, mu ayabiasí igyi fé kọbri ání bapówá ogyá, plí mú iwí ámu ọbée: ¹⁹ Nyin fú bwehé féé. Nyin fú ahádwe, fú hógyi, fú osum agyómá pú fú nsiwa lí kínkín. Nyin ání fudebi bwé dọn gyankpapọ amu. ²⁰ Táme asún ání mbu ha fú gyí, fahá ọtsi amú bọtẹtí mu Yesebel, ọde mu iwí tí ọbée, Bulu ọnósú ọtọpú amu dépọ mu atosunáhé mlé mí asúmpú, bude atsi múa ayin asún wa, bude ọkpitọ-atọ é gyí. ²¹ Nakí mu ansítọ ání ọbédamlí kluntọ bobuo Bulu, táme omedékléá obési mbuatọ. ²² Mú su néda mu, wá mu ilọ. Obówun ipian. Ní muva ahá amú bude mbua tọ ámu é bumesi, lé iwí lé mótọ

† 2:14 íni bu Numeri 22–24tọ

á, néha amó béhie wun ipian. ²³ Nómō mu abúopu amu. Akristofō ɔpasua féeé bébi ání mígyí ɔhá ámúú otowun ahá klvntō pú amó nwuntō asón ámu ni. Néka okugyíokv ikō mu bwehé ɔnó.

²⁴ “Táme mli aha tráhe ání mlulási mlibu Tiatira wúluto, mlimóbuo ɔtsi ámu atosunáhé amúú bude mú ti ‘ɔbunsám asun ɔhínehé’ amu mú á, mmóɔpu ato suráhé kvku sórá mli. ²⁵ Táme mlikita mí atosunáhé amúú mlibu amuto kínkíínkín yófun bréá néba. ²⁶ Néha ɔhá ání olegyi tógy-ítósó, ɔletalí bwé mí apé yófun ɔyí ɔnómoké túmi, obégyi ɔmá féeésú. ²⁷⁻²⁸ ɔbékpa amú owuntolunsv, bwíébwíe amú blúblúblú fé abva. Obénya túmi ámúú mí Sí lópvhá mí ámu odu. Nópυ mu bake ɔsrakpabi há mu, púsúná ání alagyi isv.‡

²⁹ “ɔhá ání ɔbu asv onúu asón ání ɔɔe Wankíhé amu dé ɔpasua ámu bláa asv.”

3

Sardis ɔpasua Nkla

¹ ɔletrá bláa mi ɔbée, “Wanlun asón ánfí sısı Akristofō ɔpasua ání ibu Sardis wúluto ɔbɔpu fee,

“ɔhá ámúú ɔbu Bulu ɔɔé asienó pú ntsrakpabi asienó ámu ɔbée: Nyin fú bwehé féeé. Fubu ida ání fukí nkpa, táme fawú fóna. ² Mú sv tsinki, afuwa fú ato tráhe amu ɔwunlín, tsúfé idekléá iwu. Nawun ání fú bwehé lesian mí Bulu ansító. ³ Mú sv kaun tóá bosuná fú pú múá fonusu. Gyi músú, afudamli klvntō. Táme ní fometsinkí á, nóbofwie fótó fé owikplu, fóméebi bréá néba. ⁴ Táme aha aku bubu wúlu amutóá bumókúkpóí amó atadie.* Bówa atadie futútú, mía amúnyɔ abénatí, tsúfé bafun. ⁵ Néha ɔhá ání olegyi isv ɔbówa atadie futútú. Mméetsitsii mu

‡ 2:27-28 Israelfō llv 2:8-9

* 3:4 Bumókúkpóí amú atadie asi

gyi bumókúbwé lalahe.

idá lé nkpa ọwulọ ámutọ. Nébílí mí Sí mva mu abọpọ ansító mbéé, míbú mu.

⁶ “Ọhá ání ọbu asu onúu asun ání Ọje Wankíhé amu dé ọpasua ámu bláa así.”

Filadelfia Ọpasua Nkla

⁷ Ọletrá bláa mí ọbée, “Wanlun asún ánfi sísí Akristofọ ọpasua ání ibu Filadelfia wúluto ọbọpọ fée,

“Ọhá ámúb ọlọwankí, ọtamawá afunu, ọde Owíe Dawid sáafi, ofínkí ọhaa tamatálí fin, ofin é ọhaa tamatálí fínkí ámu ọbée: ⁸ Nyin fú bwehé fée. Kí, nafínkí obu yáí há fú. Ọhaa méetalí fin mú. Nyin ání fuma ọwunlín, táme fagyi mí atosunáhésu, fúmekpa mí ọma. ⁹ Ọbunsám abúopọ amúb bude afunu wa bée, Yudafo bgyi ámu a, néka amú híe béba beda akpawunu fú ayabiasí. Amú fée bébí ání ntọdwé fú. ¹⁰ Fagyi mí asúnsú, fanyá klun líí kínkíínkín. Mú su néle fú lé ipian ámúb nọpọsọ ọyító ahá fée kí amutọ.

¹¹ Kí, nebá ní. Mú su kítá itọ ámúb fúbu amutọ kínkíínkín, méni ọhaa móhọ fú isugyi-ipa lé fú ibitọ. ¹² Ọhá ání olegyi isu á, nọpọ mu bwé mí Bulu ọtswékpa obu ámu ọtan. Ọmétrá dalí unu ekekẹkẹ. Nówanlín mí Bulu idá dínká musu. Nówanlín mí Bulu wúlu, igyi Yerusalem pọpwe amu idá dínká musu. Wúlu ámúb íbékplí tsú ọsúsú mí wá ba amu, nówanlín mí onutọ idá pọpwe amu é dínká musu.

¹³ “Ọhá ání ọbu asu onúu asun ání Ọje Wankíhé amu dé ọpasua ámu bláa así.”

Laodikea Ọpasua Nkla

¹⁴ Ọletrá bla mí ọbée, “Wanlun asún ánfi sísí Akristofọ ọpasua ání ibu Laodikea wúluto ọbọpọ fée,

“Ọhá ámúb butetí mu Amen, mu sọ Bulu asún fée iteba mótọ, ogyi ọdansiyin ọnọkwalipọ, ọtamawá afunu, ogyi Bulu atọ bwehé fée nwun ámu ọbée: ¹⁵ Nyin fú bwehé fée. Fumebli ogya, fúmolwíí é. Ní febli ogya ntée folwíí á, teki ibu alé. ¹⁶ Táme fugyi bwíánbwíán, fumebli ogya, fúmolwíí

é. Mú ali su nótu fú tsítsá. ¹⁷ FEE, ato onyapú fuygi, fúbu ató. Tətə méde fú hián, táme fuma tətə, fumeýín ání ohiáni fúgyi. Fubu nwe, fú ansíbi labwíé, fúna yayá. ¹⁸ Mú su ndetəi kplá fú mbée, pu kóba bəhə sika pəpəá bafwí mú ogyátó mí wá. Mú əbéha fénya ató onutónutó ní. Ntráa nde fú bláa mbée, fubóhə atadiə futútú, afuyptin fú péli múa fú yayá ámu. Bəhə afá da fú ansíbisu, méni fówun ató. ¹⁹ Ahá ání ntədwé á, amú ntəwá ɪyn wa, bíti amú ɪsu. Mú su wa nsi, afudamli kluntə. ²⁰ Ki, nliú obu-əhə, nde agoo tswí. Ní əku lónu mí əme, olefinkí há mí á, nébitíwíé mu wá, mía munyə abówa ɪbi gyi ató. ²¹ Əhá ání olegyi ɪsu á, néha mu obétsiá mí wá, mí owíe obía ámvsu. Ali kén mí é negyi ɪsu, ntsie mí Sí wá mu owíe obía ámvsu ní.

²² “Əhá ání əbu asu onúu asun ání Əhe Wankíhé amu dé əpasua ámu bláa asu.”

4

Əsósú Bulusúm

¹ ɪni əma a, nelawun ató bámbá. Nowun ání obu lafínki əsósú. Nelanu əme amú ɪlegyankpá bláa mi asón ámu. Əme amu igyi fé əkre. Əlebláa mi əbéé, “Du ba nfi, mí ansuna fú tóá ɪlehián ání ɪbéba ɪni əma.” ² Bulu Əhé leba mísú ətsáwule pé. Múá nówun a, owíe obía ku tsie əsósú unu, əku tsie músú. ³ Əhá amú ɪtsie músú ámu ɪwi dé ogyá kpa fé abwi wankláán kvá igyi pépe múa futútú. Mú ətunekv é igyi fé nyankpətáa, ɪde ogyá kpa bomlí owíe obía ámu fé ɪbwi wankláán kvá igyi fitáa bəbwe.* ⁴ Owíe-mbíá advanyə-na ɪtsie bomlí owíe obía ámu. Ahandə advanyə-na bəwa atadiə futútú bətsie mbíá ámvsu, bubun sika pəpə ɪpa. ⁵ ɪnu nyankpə lówa ɪbi fwí bi. Odekpíe, əpráda dəpvtí dáli owíe obía ámvtə. ɪbia asienó ɪlú owíe obía ámu ansító,

* 4:3 ɪbwi futútú ámu dá gyí ánfɪ yaspa. Pépe amu dá gyí kanelia. Fitáa bəbwe amu é dá gyí emerald.

idetsií. Múgyí Bulu Ɔhé asienó ámu ni. ⁶ Nowun gláasi ɔpu kvá mósó ide ogyá kpa fé atsufolibi, ida owíe obíá ámu ansító.

Mbwi akvá buki nkpa ana, ansíbi iduadúa amú nkpá múa ɔma fée, bobomlí owíe obíá ámu ɔbun nsiné inu. ⁷ Amútó ogyankpapu gyí fé gyatá. Onyɔɔsi gyí fé ɔnantswie yínhé. Ɔsaasi ansító igyi fé nyankpusa, ɔnaasi é gyí fé oyitsu ání odefulí. ⁸ Okugyíɔku bu abámba asie, ansíbi iduadúa mótó múa mú ɔma fée. Bude ulu wa ɔpa onyé beɛ,

“Wanki, wanki, wanki gyí aní Wíe Bulu Otúmípu.

Mulétsiá, otsie, ɔbélaba.”

⁹ Mbwi ámu butɔwá ulu ámu, pú numnyam, obú múa ipán há ɔhá ámúú otsie owíe obíá ámuɔu, omóowu ekekeke ámu. Ní bɔbwé mú alí á, ¹⁰ ahande adwanyɔ-na ámu é bamlí bun ɔhá ámúú otsie owíe obíású amu ansító súm mu. Mubúu inu bré féeétó ni. Fówun babwíí amú owíepa ámu tswi obíá ámu ansító blí beɛ,

¹¹ “Aní Wíe pú aní Bulu!

Fólehián ání abópu obú, numnyam múa túmi há, tsúfé fúlóbwe ató fée. Fɔbwe tógyító fú apétó.

Mó fée ilaba mótó.”

5

Okúfabi Amu Létií Ɔwulú Ámu

¹ Íni ɔma a, nowun ání ɔhá ámúú otsie owíe obíá ámuɔu ámu dé ɔwulú kúntáhé mu gyɔpito. Bɔwanlín ató dínká mú nkpá múa mú ɔma fée, bɔpu okpin tan mú ɔnó tse sienó.

² Inu nowun Bulu-ɔbɔpu otúmípu ɔkvá ɔdekplón fité ɔbée, “Ma lófon ání ɔbémaín ató asienó áni, tíí ɔwulú ámu ɔnó?”

³ Bumenya ɔhaa ɔsúsú ntée ɔsulúsu ntée ɔsulúu ayasi ání ɔbétalí tíí mú ɔnó, kla mú. ⁴ Íni su nehie su, tsúfé bumenya ɔhá ání ɔlɔfon, obétií ɔwulú ámu ntée ɔbékla mú. ⁵ Inu ahande amuto ɔkule lébláa mi ɔbée, “Mátrá su. Kí, Yuda

abusuantọ Gyatá, ogyi Owíe Dawid mu na ámu lagiy isu. Ọlọfun ání ọbémaín atọ asienó ámu, tíí ọwulú ámu ọnó.”

⁶ Inu nowun Okúfabi ọku. Ụlẹlian ání bapú mu há igyí kí. Ọlú owíe obíá ámu, akiankparu ana ámu pú ahande advanyo-na ámu nsiné. Ọbu nsiebí asienó pú ansíbi asienó. Mu ansíbi asienó ámu gyí ọjé asienó ání Bulu tawá sísí ọsulúv anfisv ọtínegyíọtíné ni. ⁷ Okúfabi amu lédali ba nkpa, ọlọbọhọ ọwulú ámu lé ọhá ámúb otsie owíe obíású amu gyọpítọ. ⁸ Inu mbwí ámúb buki nkpa ana ámu pú ahande advanyo-na ámútọ okugyíọku lémlí bún Okúfabi amu ansító. Okugyíọku dé ọsankuo pú sika pepe blanwébi ání ọhíén bọ mú. Bulu ahá mpái gyí ọhíén ánfí. ⁹ Akiankparu ana ámu pú ahande advanyo-na ámu bude ilu pọpwe wa bee,

“Fúlọfun ání fọtsu ọwulú ámu,
máín atọ asienó ámúb bọputan mú ọnó ámu.

Tsúfẹ bọpu fú há igyí, fọpu fú obugya họ ahá há Bulu.

Fọhọ ahá abusuangyíabusuan, ọblígyíọblí,
ọmágyíọmá pú ọsulúsv ahá ọtsan-ọtsan fẹfẹtọ.

¹⁰ Fayáí fú iwíe ogyíkpá há amú, fabwé amú fú igyí ahapú
ání bétsiá há aní Bulu ámu igyí.

Bégyi iwíe ọsulúsv.”

¹¹ Nẹlaki, nonu Bulu-abọpu tsọtsọtsọ ọme. Buhíé butso ání buma iklátọ. Bobomlí owíe obíá ámu múa akiankparu amu pú ahande advanyo-na ámu. ¹² Bọpu ọme kponkponkponnti wá ilu bee,

“Okúfabi amúb bọpuhá mu igyí ámu lọfun

ha túmi, iwinya múa

nyánsa pú awútọ ọwunlín,

idayilé múa numnyam pú kanfó.”

¹³ Inu nonu atọá Bulu lóbwe fẹfẹ ọme. Múá ibu ọsú múa así,
ọsulúv ayasí pú ọputọ fẹfẹ, bude ilu wa bee,

“Kanfó, idayilé, numnyam pú túmi fẹfẹ

iletsiá ðhá ámbú otsie owíe obíású amu
pú Okúfabi amu bré fée!”

¹⁴ Múú akiankparu ana ámu beblí bee, “Amen!” Inu ahande advanyo-na ámu bemlí bun sým Bulu mva Okúfabi amu.

6

Okpin Asienó Ámu Maín

¹ Mí ansító inu á, Okúfabi amu lémaín ató asienó ámbú bəputan əwulú ámu ənó ámutə kule. Inu nonuá akiankparu ana ámutə əkule léle ənó. Mu əme lelun fé əpráda əbé, “Ba!” ² Neki a, əpənkə futútú əku ní. Musu odinkápu amu dé ita, bobun mu owíepa. Ələpə əpənkə ámu kplí ba əsulúsu fé isu ogyírúá ətráa əbá bəká isá tsətsəətsə, ətra gyi isu.

³ Bréá Okúfabi amu lémaín ató nyəəsiá bəputan əwulú ámu ənó á, nonuá akiankparu amutə onyəəsi léblí əbé, “Ba!” ⁴ Əpənkə pəpə əku lédalí ba. Beha musu ədinkápu ədayí iya anyə títín kv. Beha mu túmi ání əlé iwilwii le əyító. Mú su isá leda ətínegyíətíne, ahá bəmə aba.

⁵ Bréá Okúfabi amu lémaín ató saasiá bəputan əwulú ámu ənó á, nonuá akiankparu amutə əsaasi léblí əbé, “Ba!” Neki a, əpənkə bibi əku ní. Musu ədinkápu amu dé skéeli. ⁶ Inu nonu əme kv lédalí tsu mbwi ámbú butsie nkpa ana ámutə əbé, “Ayó olónká kule ntée umə olónká asa ibóbwe ekewúle ikəká.* Táme máyintá nfə mva wáun-nyí mú.”

⁷ Bréá Okúfabi amu lémaín ató naasiá bəputan əwulú ámu ənó á, nonuá akiankparu amutə ənaasi léblí əbé, “Ba!” ⁸ Inu nowun əpənkə əkvá mu iwí igyi fé nsúó. Musu ədinkápu amu idá gyí Lowu. Afúlitə é buo mu. Beha amú túmi ání ní beye əyító aku ana á, bumóə iku kule. Bupú

* 6:6 Ilosuná ání isá su ató béhie wá ibiá.

ɔdayí iya anyɔ m̀́a akún, ɔlɔ m̀́a ɔsulɔsu mbwikítá-atɔ m̀́a amú.

⁹ Bréá Okúfabi amu lémaín ató nuusíá bɔputan mú ɔnó á, nowun Bulu asóntó akítápú amu ɔkláa afɔdiɛ-asubwi amu ayasi. Bulu asón ámu iwɪ adánsiɛ gyí su bɔmɔ amú.

¹⁰ Inu bɔsurá okitikítí kúklókúú beɛ, “Óo! Bulu Otúmípu, fú iwɪ lɔwankí, fúbu ɔnɔkwali. Ɖmenke fégyi ɔsulɔv anfisv ahá asón, fíté anɪ obugya tsú anɪ amɔpú ámu wá?” ¹¹ Mú ɔma a, beha amú féé ligá futútú, bebláa amú beɛ, butráa tsia kpalobí. Butsía yófun bréá bamó amú aba asúmpú ahógyipu amu é, amú ɔdudɔ lafun asa.

¹² Bréá ndekí a, Okúfabi amu lémaín ató siesíá bɔputan ɔsulɔv ámu ɔnó. Ɖsulɔv lekpinkí kúklókúú, owí lebi tuun fé tati bibi, ɔtsra é lepe kɔɔ fé obugya. ¹³ Múv ntsrakpabi bekpakpáa bun ɔsulɔsu, fé afú kɔɔnkɔɔnkɔɔntɪ látsun kpakpáa pɔntɔ-abíá umókúdan bun. ¹⁴ Nwulótáa lokuntá fé ɔsulɔv, tsú mú náti. Abu m̀́a ɔpu nsuné ɔsulɔv féé ledali mú otsiákpá. ¹⁵ Inu nowun aní ɔyító awíe pú ahandɛ pú isá ɔnó alúpú pú asikafɔ pú atúmípu, nkɔ́abi m̀́a iwɪsu atsiápú beyénaín abusu abwi alato pú abwi mbótó. ¹⁶ Bebláa abu m̀́a abutá ámu beɛ, “Mlikpa bun anɪsu, méni owíe obíású otsiápú amu omóowun anɪ, Okúfabi amu ɔméɛbití anɪ isv! ¹⁷ Tsúfé amú ahá isvbití eke ámu lafun. Ma ɔbétalí líí mú ɔnó?”

7

Bulu Ahá M̀́pím Lafakule Advana-na (144,000)

¹ Inu ɔma a, nowun Bulu-abɔpu ana, bulúv oyí afunka ana ámu féésú. Bude afú afunka ana ámvto kinkíinkín, méni uméetrá tsun ɔsulɔsu, ɔpusv ntéɛ oyí kuku. ² Inu nowun aní Bulu-ɔbɔpu bámbá dédalɪ tsu owí ɔdalíkpa. Ɖde Bulu Ɖkɪankpapu atóá ɔtɔpúhíe mv ahá nsu. Múv ɔlɔsurá okitikítí kúklókúú kɔ́olí abɔpu ana ámúv Bulu léha

amú túmi ðέε, bubéyintá ðsulúv móa ðpu amv. ³ Bulu-ðbøpu amv lébláa Bulu-abøpu ana ámv ðέε, “Mlimáyintá ðsulúv ntée ðpu ntée oyí kvkv, yófvn bréá nópu ató hie mí Bulu asúmpú ðsvkpi nsv asa.” ⁴ Inu bekla ahá ámvú bapú Bulu ató hie amú nsv amv féé. Amú ðvðvðv bvgyi ahá mpím lafakvle advana-na (144,000). Amú féé botsú Israel abusuan dúanyð ámvto. ⁵⁻⁸ Behie ahá mpím dúanyð (12,000) nsv abusuan ámv kugyíkvto. Abusuan ámv adá gyí, Yuda, Ruben, Gad, Asa, Naftali, Manase, Simeon, Lewi, Isakar, Sebulon, Yosef pú Benyamin.

ððm Ání Botsú ðmá-ðmátó

⁹ Inu ðma a, nowun ððm kvá ðhaa méetalí kla amú. Botsú ðmágyíðmá, abusuangyíabusuan, ðsulúsv ahá ðtsan-ðtsan pú ðblúgyíðblúto. Bulí owíe obía ámv pú Okúfabi amv ansító. Bøwa ligá futútúútú, bvde mbláa. ¹⁰ Bøsvrá okitikíti kóklókúv be, “Aní Bulu ámvú otsie owíe obíasú pú Okúfabi amv tóho ahá nkpa!” ¹¹ Inu á, Bulu-abøpu amv féé belí bómlí owíe obía ámv pú ahande advanyð-na ámv pú akiankpa pu ana ámv. Bemlí bun, pú ansító bun ðsulúto owíe obía ámv ansító, súm Bulu, ¹² blí be, “Amen! Ikanfú, numnyam, nyánsa, ipán, obú, túmi pú ðwvnlín ibwée mv kle bré féé! Amen!”

¹³ Inu ahande amvto ðkvle léfité mí ðέε, “Amendi gyí ahá ánfi bøwa ligá futútúútú ánfi? Nkónú botsú?”

¹⁴ Múv nebláa mv mbée, “ðhande, fú yín.”

Múv ðlebláa mv ðέε, “Ahá ánfi gyí ahá aní batsvn asvn wunhe kvønkpvønti ámvto dáli ni. Amú láfví amú atadie Okúfabi amv obugyato, ilafúli futútúútú ní. ¹⁵ Mú sv bulí Bulu owíe obía ámv ansító, bvde mv súm ðpa-onyé mv ðsvwékpa inu ní. ðhá ámvú otsie owíe obía ámvsv é obétsiá amútó, bún amúsú. ¹⁶ Akón móa ðmewóli méetrá kíta amú, owí ntée ðpawi é iméetrá to amú. ¹⁷ Tsúfé Okúfabi amúv ðlú Bulu owíe obía ámv asi ámv ðbðvwe amú ðkpa pú.

Obégya amú nkpa, kpá amú ya nkpa-ntsu ámu ɔwíkpa, aní Wíe Bulu obétsitsíi amú ansí ntsú fée.”

8

Okpin Sienósí Ámu Maín

¹ Bréá Okúfabi amu lémaín ato sienósíá bɔputan ɔwólú ámu ɔnó á, ɔsúsú lólúá fé dɔnhwírí-fun. ² Inu nowun Bulu-abɔpu asienó amúú bulí mu ansító ámu. Beha amótó okugyíoku ɔkpe.

³ Bulu-ɔbɔpu bámbá lébá belí afɔdie-asubwi amu ansító. Ɔde sika pepe blanwébi ání butɔwá ɔhíén ogyá mótó. Beha mu ɔhíén tsɔtsɔtsɔ, ɔlɔputsíá Bulu ahá mpáitɔ, púyéɔnká sika pepe afɔdie-asubwi amúú iyi owíe obíá ámu ansító ámuvsu. ⁴ Mu ɔhíén ámu ogyási letsíá Bulu ahá ámu mpáitɔ, kúsú tsú afɔdie-asubwi ámuvsu yó Bulu ansító. ⁵ Inu Bulu-ɔbɔpu amu lótsu ɔhíén blanwébi ámu, ɔlele ogyá afɔdie-asubwi ámuvsu wá mótó, fun mú dá ɔsulúsv. Inu nyankpu lówa ibi fwí bi. Odekpíe, ɔpráda deputí, ɔme ɔtsan-ɔtsan delún kúklókúú, ɔsulúú é dekpunkí kpakpakpakpa.

Ikpe Asienó Ámu

⁶ Bulu-abɔpu asienó amúú buɔe ikpe asienó ámu é beda iwísv há mú fulí.

⁷ Bulu-ɔbɔpu gyankpapu lófulí mu ɔkpe. Múú botsu atsufolibi múa ogyá ání obugya lefráa mú, tswí mú wílí ɔsulúsv. Ní beye ɔsulótɔ asa á, mótó iku kulé múa músú nyí pú músú ífá fée lɔhɔ plíplíplíplí.

⁸ Bulu-ɔbɔpu nyɔɔsv lófulí mu ɔkpe. Inu bɔtswí tɔku fé ibu kɔɔnkɔntíá idehóó wá ɔputɔ, ɔputɔ yéé asatɔ ikulé leɔamlí obugya. ⁹ Ɔputɔ mbwíá bukí nkpa féeétó yéé asatɔ iku kulé bowu, ntsusv ayibitɔ yéé asatɔ iku kulé é lobwiebwíe.

¹⁰ Inu Bulu-ɔ̀bɔ̀pu sáásí lófulí mu ɔ̀kpe. Ɔ̀srakpabi kpɔ̀nkpɔ̀nkpɔ̀ntɔ̀ kuá ide ogyá tsii fé obia lékpa tsú ɔ̀súsú beda ntsu tsunheá ibu ɔ̀yító féétóye asato iku kulesu.

¹¹ Ɔ̀srakpabi amu dá gyí “Ɔ̀kitá.” Inu ntsu tsunhe amutóyée asato iku kule lówa ɔ̀kitá dɔ̀n ɔ̀kpín. Mú ɔ̀kitá su ahá tsɔ̀tsɔ̀tsáá bonu mú bowu.

¹² Ɔ̀bɔ̀pu náásí lófulí mu kle. Ilɔ̀wɔ̀ owí múa ɔ̀sra pú ntsrakpabito yée asato iku kule. Mú féé lodun. Íni su ɔ̀yi kehe múa owi tahétó yée asato iku kule é loklun.

¹³ Neki a, oyitsu ɔ̀ku défulí, odesú kɔ̀klókúú ɔ̀bée, “Ahá ání bétsiá ɔ̀sulúv anfisv asa Bulu-abɔ̀pu asa atráhe amu bófulí amú nkpe amu bɔ̀gyówi tsenɔ̀-tesa!”

9

¹ Bulu-ɔ̀bɔ̀pu núúsí lófulí mu ɔ̀kpe. Nowun ání ɔ̀srakpabi lékpa tsú ɔ̀súsú beda ɔ̀sulúv, bɔ̀pu ulán klúk-lúúklúá ima ɔ̀ka sáafi há mu. ² Múú olefinkí ulán klúkklúúklú ámu ɔ̀nó, ogyási ledali mútó fé obuntɔ̀. Ogyási amu ulaha nsantɔ̀ féé ilebi tuun. ³ Inu atsantsanku bedali tsu ogyási amutɔ̀ ba ɔ̀sulúv. Beha amú túmi beɛ busúra ahá fé nyankpɔ̀kpíe. ⁴ Bebláa atsantsanku ámu beɛ, bumápu ɔ̀nó da ifá ntée nyí kuku, dɔ̀n ahá ámú Bulu nsuhíeto medín amú ɔ̀vɔ̀kpɔ̀ amu. ⁵ Bumeha amú ɔ̀kpa ání bumóo amú, táme buhíe wa amú iwɔ̀sin tsra anu kéké. Amú iwɔ̀sin ámu ibwé fé aliá nyankpɔ̀kpíe-svrá tɔ̀hɔ̀ ɔ̀sin. ⁶ Ahá bóduká lowu nke ámutɔ̀, táme buméenya. Bóbɔ̀ mbódí ání bówu, táme bumóowu.

⁷ Atsantsanku ámu belian mpɔ̀nkɔ̀á bahíhie amú há isá, tɔ̀ku idun amú nwunsu fé sika pɛpɛ ipa. Bɔ̀wa anyánpɔ̀sa ansító. ⁸ Amú nwunsu-imi bu iswí fé ɔ̀tsi klé. Amú ayín é igyi fé gyatá klé. ⁹ Bɔ̀wa kántó atíntɔ̀ ání bɔ̀pu dátɔ̀ bwé. Ní budefulí á, amú ate totsúlá fé mpɔ̀nkɔ̀ múa keké tsɔ̀tsɔ̀tsáá busrí bɔ̀yó isá. ¹⁰ Bubv odú, itɔ̀súrá fé nyankpɔ̀kpíe. Beha amú túmi beɛ, buvúv amú odú ámu

pilan ahá tsra anu kéké. ¹¹ Ulán klúklúúklúá uma oka abapu gyí amú owíe. Butetí mu Hebrifo oblíto bee, Abadon. Griiki oblíto é butetí mu bee, Apolion. Mú asi gyí, “Ató Oyintápú.”

¹² Asun wunhe gyankpapu lámó onó á. Anyo tráhe é ibá.

¹³ Bréá Bulu-abapu síésí lófulí mu okpe a, nonu ome ku ledali. Uledali tsu sika pepe afodie-asubwi ámu okonkí ana ámutó Bulu ansító unu. ¹⁴ Ide abapu amú obófulí okpe amu bláa obéé, “Sanki abapu ana ámú beklí mántá ntsu yílé Efrate onó ámu.” ¹⁵ Bulu léla amú yáí há alí bré ánfí, ofí ánfí, ótsra ánfí, eke ánfí pú dónhwírí anfi obéé, busánki amú abuyomó oyító ahátó yéé asato iku kule fée. ¹⁶ Bebláa mí aní isá akópú ámu oduduo bóbwe bliba lafanyo (200,000,000), budin mpònkòsu. ¹⁷ Nowun mpònkò pú amúsú adunkápú mí atowunhe amutó, bowa kántó atíntó. Aku klé lepe fé ogyá, aku klé lebi, aku é klé igyi bate-nfo. Mpònkò ámu nwun igyi fé gyatá klé, ogyá múa ogyási pú atonkodu dedali amú onótó. ¹⁸ Alí asun wunhe aku asa, igyi ogyá, ogyási pú atonkodu amu uledali tsu mpònkò ámu onó, iwomó oyító ahátó yéé asato iku kule. ¹⁹ Megyí amú onótó nkule asun wunhe túmi tedáli tsu. Ibo amú odútó é, tsúfé amú odú igyi fé iwó, ibu nwun, itepílan ahá.

²⁰ Anyánpúsa amú besian ósulúsu, bumowu asun wunhe amutó ámu fée bekiná bumedamlí kluntó. Bumesi oje laláhe múa atunkuá bapú sika pepe, sika futútú, kóobri, abwi múa nyí aná bwé súm. Alí oje laláhe pú atunku anfi butamawun ató, butamanú asún, butamanátí. ²¹ Alí kén bumedamlí kluntó sí amú tsiátó laláhe; ígyi ahámó, okpé, atsi múa ayin asúnwa múa owi ámu é bwe ní.

10

Bulu-abapu Mwa Obóló Túkúríbí

¹ Inu nelawun Bulu-ðbapu ðwonlínpu bambá ðkuá otsú ðsúsú. Agyinde lobomlí mu, nyankputáa ilan mu awunso. Mu ansító lówankí fé owí, mu ayabi igyi fé ðsoti ání ogyá bu mótó. ² ðde ðwulú túkúrííbi kuá ðleteí mótó. Mu gyapu yabi iyi ðpusu, mu buna yabi é iyi ðsulúsú. ³ ðlakplín kúklúkú fé gyatá dékpoún, ðpráda asienó ámu ləputí. ⁴ Bréá ðpráda asienó ámu ləputí, mbée anwanlin asún ámúú ileblí ámu a, nonu ðme bámbá tsú ðsúsú. ðme amu déblí ðbée, “Máwanlín asún ámúú ðpráda asienó ámu ulablí ámu. Pwá fú kpawunuta.”

⁵ Múú Bulu-ðbapu amúú nowun, ðlí ðpu múa ðsulúsú ámu lótsu mu gyapu ibi fúá yó ðsúsú. ⁶ Inu ðleka ðhá ámúú ðbu nkpa bré féétó ámu ntam. Múlóbwe ðsú múa asi, ðpu múa mótó ató féé, ðleblí ðbée, “Bumétrá si tsiá! ⁷ Táme bréá Bulu-ðbapu síénósí amu ðbófúlí mu ðkpe a, ali bré ámutə Bulu asun ηαίνήé amúú ðlehie yáí ðbée, móbwe ámu íbéba mótó ní. íbéba mótó fé aliá ðlebláa mu asúmpú, bugyi mu ðnósú atóípu amu.”

⁸ Inu ðme amúú ide mí asún bláa tsú ðsúsú ámu létrá bláa mi ðbée, “Yðhə ðwulú amúú ulafínki ámu le Bulu-ðbapu amúú ðlí ðpu múa ðsulúsú ámu íbitə.”

⁹ Mú su nəγə Bulu-ðbapu amu wá mbée, ðpúu ðwulóbi ámu ha mi. Múú ðlebláa mi ðbée, “Hə, afuwí mú! íbówa fú ðdwe débídébí fé ðkwén, táme iméekanáa fú iputə.”

¹⁰ Inu nəhə ðwulóbi ámu lé mu íbitə, nəwi mú. íləwa mí ðdwe débídébí fé ðkwén, táme imetepí kanáa mí iputə.

¹¹ Múú ðletrá bláa mi ðbée, “ílehián ání félablí asún ámúú íbéba ahá féésú ámu. íbéba ðmá féé, ðlíu ðtsan-ðtsan ablípu pú awíé féésú, fé ali amúú Bulu lalé súná fú ámu!”

11

Adansífə Abanyó Ámu

¹ Inu ðma a, beha mí oyía butəpúsúsu ató. Múú Bulu-ðbapu amu lébláa mi ðbée, “Kusu afuyosusúu Bulu

ɔtswékpa obu ámu pú afɔdiɛ-asubwi amu, afvula unu asúmpú amu. ²⁻³ Táme másusúu nwunsínésú amu mú. Si unu tswi, tsúfé Bulu lasí unu há ahá ání bumegyí Yudafɔ. Ali ahá ánfí bétsatsáa wúlu wankíhé amusu tsra advana-nyɔ (42), igyi nke ɔpím-ɔkɔle lafa-anyɔ aduesie (1,260). Néha mí adansifɔ abanyó bédídá akpekpe, há amó túmi, béblí mí asún ání nalé súná amú nke ámutɔ.”

⁴ Amúgyí nfo-nyí anyɔ pú ɔkandíɛ-nyí anyɔ ámúú líú Bulu, ogyí gyí féesú ogyípú amu ansító ní. ⁵ Ní ɔku ɔbwé agywun ání obépilán amú á, ogyá bédali amú ɔnó, hɔ mu mó. Alí ɔhá ání odekléá obépilán amú obówu ní. ⁶ Bulu adansifɔ ámu bubu túmiá bétalí há nyankpu omóotswie nkeá bópublí Bulu asún ámu fée. Bubu túmiá bétalí há ntsu kugyíku bédamlí obugya. Bétalí lé asun wunhe kugyíku é ba ɔsulúsu brégyíbréá budeklé.

⁷ Ní adansifɔ ánfí béblí amú asún tá á, ɔbwikítá-atɔ amúú ɔtedáli tsu ulán klúklúúklúá uma ɔkato ámu ɔbóko amú isá, gyí amúsú, mó amú. ⁸ Amú afúli bédí amú wúlu yilé brɔnusu. Botetí wúlu yilé ánfí beɛ, “Sodom múa Egyipte.”* Inu beda amú Wíe Yesu mántá oyikpalíhesu, mó ní. ⁹ Ahá bótsu abusuangyíabusuan, ɔblígyíɔblí, ɔmágyíɔmá pú ɔsulúsu ahá ɔtsan-ɔtsan féesú ba beki afúli amu nkensá múa ifun. Bumécha ɔkpa abupula amú kúráá. ¹⁰ Bulu ɔnósú atáípú abanyó ánfí bawú su ansí bégyi ɔsulúsu atsiáípú. Bégyi nke kɔnkpɔnti, kíé aba ató, tsúfé Bulu ɔnósú atáípú anfi bawá amú ipian kɔnkpɔntitɔ ki. ¹¹ Táme nkensá múa ifun ámu ɔma a, Bulu léha ɔɣé lelawíé amótó, belakusú líí ayabisu. Mú su ifú lehie kítá ahá ání bowun amú. ¹² Inu Bulu ɔnósú atáípú abanyó ámu bonu ɔme kɔnkpɔnti ku tsú ɔsúsú, ulébláa amú ɔbéɛ, “Mlɔdu ba nfi!” Amú alupú ámu bulí bude amú kí, agyinde lotsu amú

* ^{11:8} Wúlu yilé ánfí dá onutó gyí Yerusalem. Bɔpukápú Sodom múa Egyipte, tsúfé amú bwéhé laláhe lelían aba.

ya ɔ́súsú. ¹³ Ɔsúlúv lékpunkí kpukpukpukpu alí bré ámutɔ kén. Ní beye wúlu amutɔ idú á, iku kule fée lobwie bun ɔsúlúvto gbloo. Ahá mpím-sienó (7,000) bowu ɔsúlúkpunkí ámutɔ. Ifú lehie kitá atráhe amv. Mú sv bowa ɔsúsú Bulu numnyam.

¹⁴ Asun wunhe nyɔɔsi latsun, saasi srí ibá á.

Ɔkpe Sienósi

¹⁵ Múú Bulu-ɔbɔpu osienósi lófulí mv ɔkpe. Inu ɔme akpɔnkpɔnti lelun tsu ɔsúsú bee, “Séi á, ɔyító iwíegyí lamlí aní Wíe Bulu mva Kristo, (ɔhá aní Bulu ladá mv ofúli amv) klé. Obégyi iwíe bré fée!” ¹⁶ Inu ahande advanyɔ-na ámúv butsie amú mbíású Bulu ansító ámv fée bobun, súm mv, ¹⁷ blí bee,

“Aní Wíe Bulu Otúmípu, adá fú ipán.

Fúlétsiá, fúbv inu bré fée.

Tsúfée fapú fú túmi kpɔnkpɔnti ámv
fi fú iwíegyí así!

¹⁸ Ɔmá-ɔmá benya ɔbló,

bré lafun aní fú é fénya ɔbló.

Bré lafun aní fégyi awupó asón.

Bré lafun aní fóbwe yilé há fú asúmbi, bugyí fú ɔnósú
atɔípú amv,

pú Bulu ahá aní butenyá fú ifú,

nyebí pú ahande fée.

Bré lafun aní féhi ahá aní bamó ahá ɔyító fée.”

¹⁹ Inu befinkí Bulu ɔtswékpa kpɔnkpɔnti ámúv ibv ɔsúsú ámv, bowun mv Ntam-dáka obu ámutɔ. Inu nyankpu lówa ibi fwí bi. Odekpíe, ɔpráda dɛputí, ɔme ɔtsan-ɔtsan lelun kóklúkúú, ɔsúlúv lékpunkí; átsufolibíá igyi fé akwebi léhie kpá.

¹ Inu osúna kpɔ̀nkpɔ̀nti ku lédali ɔ̀súsú. Nowun ɔ̀tsi ɔ̀kuá ɔ̀didí owí, mu ayabi yí ɔ̀tsrasu. Obun owíepa, ntsrakpabi dúanyɔ́ ipan músú. ² Ɔ̀tsi ámu dé ɔ̀mé, ikwí de mu dwiín, odekikíni, ɔ̀de okitikíti ogyo obí ámu kwí.

³ Inu osúna bámbá letrá dalu ɔ̀súsú. Nowun bítí kpɔ̀nkpɔ̀nkpɔ̀nti ɔ̀kuá ɔ̀lepe, ɔ̀bu nwun asienó pú nsiebí dú. Owíepa asienó bun nwun asienó ámusu. ⁴ Ní beye ntsrakpabi féétó aku asa á, butí ámu lópu mu odú kíkí mla iku kule, ɔ̀lebitía mú kpá beda ɔ̀sulósu. Ɖlí ɔ̀tsi ámuú ɔ̀mé de mu dwiín ámu ansító, ménu ɔ̀tsi ámu onyá kwí pé á, obótsu mu bi ámu mé. ⁵ Ɔ̀tsi ámu lókwí obiyímbi áni ɔ̀békpa ɔ̀má féé owuntɔ̀linsu. Botsu kebi ámu ya Bulu wá, yéyaí mu obíasú. ⁶ Inu ɔ̀tsi ámu lésrí yó dimbísú ɔ̀tínéá Bulu léla yáí há mu. Béki musu nke ɔ̀pím-ɔ̀kule lafanyɔ́ aduesie (1,260).*

⁷ Inu, isá leda ɔ̀súsú. Bulu-ɔ̀bɔ̀pu dehen Mikael mua mu aba abɔ̀pu bəko bítí ámu mua mu aba abɔ̀pu. ⁸ Táme bítí ámu mua mu abúɔ̀pu bumetalí líi amú ɔ̀nó, begya amú lé ɔ̀súsú unu. ⁹ Inu bekpa bítí ámuú butetí mu iwɔ́ dada amu mua mu abɔ̀pu beda ɔ̀sulósu. Mu butetráa ti Bulu olupú ntée Satan pú ɔ̀yító ahá féé ɔ̀mlépu ni.

¹⁰ Inu nonu ɔ̀me kúklókúú ku lelun ɔ̀súsú. Uleblí ɔ̀béé, “Séi gyí bréá Bulu ɔ̀bóhɔ́ mu ahá nkpa ní!

Bulu ɔ̀bópu mu túmi gyi iwíe.

Mu Kristo, (ɔ̀há ámuú Bulu ladá mu ofúli amu) é ɔ̀béle mu túmi ɔ̀wan.

Tsúfé bakpá ɔ̀há ámuú oletsia lé anu Akristofɔ́ ilá ámu dá ɔ̀sulósu.

Ɖbunsám méetrá ka asún dínká anu apíósó, anu Bulu ansító ε.

¹¹ Bapú Okúfabi amu obugya pú mu iwɔ́ adánsie ámuú begyi amu gyi musu.

* 12:6 Nke ɔ̀pím ɔ̀kule lafanyɔ́ aduesie (1,260) ánfí igyi nfinsa múa ifun.

Bumadwe amó iwí dúbídubi,
su bumenya amó lowu kúráá ifú.

¹² Íni su osúsú pú mliá mlibu unu fée
mlinya ansigyí.

Táme osulúv mva opu,
mligyawi ní.

Obunsám laba mli wá oblósú,
tsúfé alawun ání mu nke trá mætsó.”

¹³ Bréá bótí ámu lówun ání bafun mu dá osulúsv á,
olokusú kplá gya otsi amúb olókwí obí ámu. ¹⁴ Táme beha
otsi ámu oyitsu kponkpõnkponõti abámba anyõ, ménu
obétalí fúlí sí bótí ámu yó mu otsiákpá dimbísú unu. Bulu
obéku musu unu nfinna mba ifun.† ¹⁵ Inu bótí ámu léfen ntsu
tsunhe dali mu onótó wólí otsi ámu oma, ménu ibékítá mu
nátí. ¹⁶ Táme osulúv légyí otsi ámu buale. Ntsu amúb bótí
ámu léfen tsu mu onótó ámu fée leme wíe osulótõ. ¹⁷ Inu
bótí ámu lénya oblé otsi ámusu, pú mu oblé gya mu abí
atráhesu. Amógyí ahá ání butegyí Bulu mblasu, bude Yesu
iwí adánsie gyí a. ¹⁸ Inu bótí ámu lési oda opu amu onó.‡

13

Mbwikítá-atõ Anyõ Aku

¹ Íni oma a, nowun ání obwikítá-atõ kponkpõnti oku
dédali tsu opu amutõ obá. Obu nwun asienó pú nsiebí
dú. Owíepa bun nsiebí ámu kugyíkusu. Bõwanlín dá ání
olokusú líí Bulusu dínká nwun ámu kugyíkusu. ² Obwi ámu
gyí fé dundu, táme mu ayabi lomóní, mu akuti bu iswí fé
osísré ayabi, mu onó é igyi fé gyatá onó. Bótí ámu lópu mu
túmi, iwíegyí pú õwonlín ku há obwi ánfí. ³ Nowun ání olõ
kponkpõnti ku idin obwi ámu nwun asienó ámutõ kulõsu.
Olõ ámu lómoní, ibétalí mó mu, táme uleta, omowu. ulõwa

† 12:14 Nfinna mba ifun igyi nke opu okule lafa-anyõ aduesie
(1,260). ‡ 12:18 Íni bu nwulú dada amu akutõ: Inu nesi líí
opu amu onó.

oyító ahá fée wánwan, beklá buo mu. ⁴ Bosúm bítí ámu, tsúfè alapó mu túmi há òwí ámu. Bosúm òwí ámu é, fítè bée, “Ma lófún òwí ánfí? Ma òbétalí líí kó mu?”

⁵ Bulu léha òwí ámu òkpa ání òblí abusus akpòkpònti pòkusu lu musu. Òleha mu òkpa ání òbwéé túmila kugyíkúvá odeklé tsra advana-nyò (42), igyi nfinsa múa ifún ámútò. ⁶ Òwí ámu lóbwií ònó, blí abusus pòkpóí Bulu mva mu dá pú ahá ámú búbu òsúsú, igyi mu otsiákpá amu. ⁷ Bulu léha mu òkpa ání òkòò Bulu ahá, ogyi amúsú. Òleha mu òkpa ání ogyíí iwíe abusuangyíabusuan, òblígyíòblí, òmágyíómá pú òsulúsu ahá òtsan-òtsan féesú. ⁸ Oyító ahá fée bósum òwí ámu. Ahá ání bumóosum mu gyí ahá ání òwanlín amú adá wá Okúfabi amú òbòpohá igyí asa oyí lebelun amu nkpa òwolútó.

⁹ Òhá ání òbu asu onúu. ¹⁰ Òhá ání ida yaí ání békítá mu ndoun isátó a, békítá mu isátó, kpá mu náti. Ní ida yaí ání òku obésin òdayí ònó é á, òdayí ònó obésin. Íni su Bulu ahá butómi, abulu kínkín amú hógyitò.

¹¹ Inu netrá wun òwí òku é lówò dali òsulútò. Òbu nsiebí anyò fé okúfabi, táme òlòtòí fé bítí. ¹² Òwí ánfí líí òwí gyankpapu amu ansító, òlòyò mu agyómá kugyíku òwí gyankpapu amu túmitò. Íni léha òsulúsu atsiápú fée bosúm òwí gyankpapu amú òlò ledínká mu, uleta, omowu ámu. ¹³ Òwí nyòòsi amu lóbwe osúna akpòkpònti. Òleha ogyá lekpa tsú òsúsú beda, ahá fée bowun. ¹⁴ Òlòpò osúna amú òlòbwe òwí gyankpapu amu ansító ámu mlé oyító ahá òbée, bupwéé òkpi, ogyi fé òwí gyankpapu amú òwò mu òdayí iya anyò, omowu, òtráa otsie nkpa ámu. ¹⁵ Bulu léha òwí nyòòsi anfi òkpa ání òwáa òkpi ámu òhè, fówun ibétalí tóí. Inu òkpi ámu léha òbée, bumóò ahá ání bumóosúm mu. ¹⁶ Òleha ání bwhíe ahá fée nsu, amú gyòpi ibusu ntée amú òsokpi; nyebí ahande, ahíánfò múa asikafò, nkpábi múa iwí agyípú. ¹⁷ Òhaa méetalí fé tòtò ntée hò tòtò,

nkéti ðhá ání ðbwi ámu nsuhíeto, igyi mu idá ntée ibi ání ilí há mu idá din musu.

¹⁸ Iní léhián nyánsa, méní fétalí nú ibi ámu asi. Ibi ámu ilí há ðbwi gyankpaw amu, igyi oyin ðku dá. Ibi ámu gyí lafasie aduesie-sie (666).

14

Okúfabi Amu Mva Mu Ahá

¹ Inu nelawun Okúfabi amu líí Sionbusu. Ahá mpím lafakule advana-na (144,000) bulí mu wá. Okúfabi amu mua mu Si idá din amó ðsvkpi. ² Inu nonu ðme ku tsú ðsóú fé ntsu lábólá, idekpa yi, ntée ðpráda députí, ntée fé nsankuo tsòtsòtso budeda. ³ Bude ilu pòpwe ku wa owíe obíá ámu, akiankpwana ana ámu pú ahande advanyona ámu ansító. ðhaa má unvá ðbétalí súan ilu ámu ðsolóv anífu, nkéti ahá mpím lafakule advana-na (144,000) amúv Bulu laho amó nkpa tsú ðsolóv ámu nkule pé. ⁴ Ali ahá ánfí gyí ahá ání amó iwí letin, bumeyín ðtsi, butobuo Okúfabi amu ðtínegyíótínéá ðyó ní. Amó nwunsu ikò òleka anyánkpósa féétó, fé ató-abí gyankpaw há Bulu mua Okúfabi amu ni. ⁵ Butamawá afunu, ðlala kuku é uma amó iwí.

Bulu-abòpò Abasá Asun Blíhé

⁶ Inu nelawun Bulu-òbòpò ðkvá ðna afútó, ðde asun wankláán amúv ibu nu bré féétó amu. ðbá bebláa ðyító ahá, abusungyíabusuan, ðblígyíòblí ablípó, ðmágyíómátó ahá pú ahá ðtsan-òtsan. ⁷ Bulu-òbòpò amu lókpilun blí ðbéé, “Mlunya Bulu ifú, amlíwa mu numnyam, tsúfé mu asúngyíbu lafun. Mlisum mu. Múlóbwe ðsú múa asi, ðpu múa ntsu féé!”

⁸ Bulu-òbòpò onyòòsi é lóbuo mu, beblí ðbéé, “Babilon labwíé. Wúlu yilé Babilon labwíé. Tsúfé Babilon lahá ðmá-ðmá banu mu mbvato-ntá ání itehá Bulu ðbló tókúsú!”

⁹ Bulu-ɔ̀bɔ̀pɔ̀v saasi é búo amú, ɔ̀deblí ɔ̀béé, “Ní ɔ̀ku lósum ɔ̀bwi ámu mva mu ɔ̀kpi ámu, há bɔ̀pɔ̀v amú nsuhieto hie mu ɔ̀sɔ̀kpi ntée mu ibi nsu a, ¹⁰ ali ɔ̀há ámu obónu Bulu ɔ̀bló-ntá, bumefráa mú asa betséi mú wá Bulu ɔ̀bló-eweto ní. Bulu ɔ̀bɔ̀pɔ̀v ogyá múa atonkodu bití mu isu, mu abɔ̀pɔ̀v wankíhé pú Okúfabi amu ansító. ¹¹ Amú isubití ogyá ámu ogyási bókusú yó ɔ̀súsú bré féétó. Ali ahá ámu gyí ahá amú bosúm ɔ̀bwi ámu pú mu ɔ̀kpi, ɔ̀bwi ámu nsuhieto din amúsú ámu ni. Iwi móolwii amú ekekekeke.”

¹² Íni sù ilehián ání Bulu ahá bótomi líi kínkín, gyi Bulu mblasu, wá ɔ̀nɔ̀kwali há Yesu ni.

¹³ Inu nonu ɔ̀me ku lótsu ɔ̀súsú ɔ̀béé, “Wanlin tswi fee, ‘Ansi bégyi ahá ání bówu ani Wíe agyómátó tsú séi púya!’”

Bulu ɔ̀ɔ̀hé ámu ɔ̀béé, “Ee, ibu mútó. Ansi bégyi amú lélé. Béda ɔ̀kpónú tsú amú ipian féétó, tsúfé amú bwehé wankláan bóbuo amú.”

Bulu Asóngyí Iwi Atowunhe

¹⁴ Inu neláki a, agyinde futútú ku ní. ɔ̀ha ɔ̀kuá ogyi fé Nyankpusa-Mv-Bi ámu tsie agyinde ámusu. Obun sika pepe owíepa, ɔ̀de tsuni kláklá ku. ¹⁵ Inu Bulu-ɔ̀bɔ̀pɔ̀v ɔ̀ku é lédalí tsu ɔ̀súsú Bulu ɔ̀tswékpa unu ba. Mú ɔ̀lɔ̀kplún bláa ɔ̀há amú ɔ̀tsie agyindesu ámu ɔ̀béé, “Pv fú ɔ̀dayí ámu tun ató-abí, tsúfé ɔ̀sulúsu ató-abí lapé yóí. Mú tínbi lafon!” ¹⁶ Mú sv ɔ̀há amú ɔ̀tsie agyindesu ámu létunkí mu tsuni amu, tun ɔ̀sulúsu ató-abí ámu féé.

¹⁷ Bulu-ɔ̀bɔ̀pɔ̀v ɔ̀ku é lédalí tsu ɔ̀súsú Bulu ɔ̀tswékpa obuto unu. Mu é ɔ̀de tsuni kláklá ku.

¹⁸ Mú Bulu-ɔ̀bɔ̀pɔ̀v ɔ̀kuá ɔ̀bu túmi ogyá ámusu é lédalí tsu afɔ̀die-asubwi ámu asi ba. ɔ̀lɔ̀kplún bláa Bulu-ɔ̀bɔ̀pɔ̀v amú ɔ̀de tsuni ámu ɔ̀béé, “Pv fú tsuni amu ka wáun-abí ámu ɔ̀kpitsa, tsúfé abí ámu ilapé.” ¹⁹ Mú sv Bulu-ɔ̀bɔ̀pɔ̀v amu lótswi mu tsuni amu káka ɔ̀sulúsu wáun-abí ɔ̀kpitsa féé, kpá wáun-abí ámu wá ɔ̀tínéá butenyímé ntsu lé mútó. Íni ulí

há Bulu ɔbló. ²⁰ Wúlu amu mmuátse benyímé wáun-abí ámu. Obugya lédali mótó, idetsúun waa fée ntsu tsonhe. Mú iswító bóbwe máli lafakule adukwe (180). Mú oklú é bóbwe ayabi anu.

15

Bulu-abɔpu Pú Asun Wunhe Asienó Tráhe

¹ Inu nowun osúna bámbá kvá ibu ifú, ibu wánwan ɔsúsú. Nowun ání Bulu-abɔpu asienó buɔe asun wunhe asienó ání Bulu ɔbɔpɔbí ahá isu asa ikluntɔ bólwií mu.

² Inu nowun ɔpu kvá igyi fée ahvhwé, ipepe fée ogyá. Nowun ání ahá bulí mú ɔnó, buɔe Bulu nsankuo. Alí ahá ánfu gyí ahá ání bakó gyi ɔbwi gyankpapu amu mva mu ɔkpi ámu pú nsóhie-ibi ámú ulí há mu dá ámusu ní. ³ Buɔe Bulu osúmbi Mose mva Okúfabi amu iu wa beɛ,
“Aní Wíe Otúmípu,

fú bwehé bu ifú, ibu wánwan.

Fú bwehé fée igyi ɔnɔkwali, ida ɔkpa.

Owíeá mu iwíegyi tamamó ɔnó.

⁴ Aní Wíe, ma oméenya fú ifú, wá fú numnyam?

Tsúfé fú nkule lówankí.

ɔma fée béba bosúm fú,

tsúfé falé fú yilébwe ɔwan.”

⁵ Iní ɔma a, neki ɔsúsú, nowun ání Bulu ɔtswékpa obu, igyi tati-obu ámú itosúná ání Bulu bu amú wá ámu ɔnó iya. Nowun mótó ɔwankíkpa amu. ⁶ Nowun Bulu-abɔpu asienó amú ɔpu asun wunhe kpɔnkpɔnti asienó bá amu. Bedali tsu ɔwankíkpa inu. Bɔwa ɔhráda atadiéa ilówankí, ide ogyá kpa, ɔpu sika pepe ɔfé tsán. ⁷ Akiankpapu ana ámutɔ ɔkule léha Bulu-abɔpu asienó ámutɔ okugyíɔku sika blanwébi ání Buluá ɔbu inu bré féeɔ ɔbló ibu mú dédédédé. ⁸ Bulu numnyam pú mu túmi leha ogyási lɔbulá Bulu ɔwankíkpa inu fée. ɔhaa métalí bítiwíe mótó, yófun bréá

Bulu-abɔpu asienó ámu batséí asun wunhe asienó ámu fée wólí ɔsulúsu.

16

Bulu ɔblí Ablanwébi

¹ Inu nonu ɔme kpɔnkpɔnti kvá ɪɛdalɪ tsu Bulu ɔwankíkpá inu. ɪɛ abɔpu asienó ámu bláa ɔbéɛ, “Mliyo, amliyetseí Bulu ɔblí ablanwébi asienó ámu wólí ɔsulúsu.”

² Mú su ɔbɔpu gyankpapu lédalɪ tsu Bulu ɔtswékpa inu yetseí mu kle wólí ɔsulúsu. Inu ahá ámúú ɔbwi ámu nsuhíetɔ ɪɪɪn amúsú, buɛ ɔkpi ámu sum ámu ɪwi létsitsíi nɪ akpɔnkpɔnti, ɪɛ amú dwíín.

³ ɔbɔpu nyɔɔsi létseí mu kle wá ɔputɔ. ɔpu amu lémlí fé fúli obugya. Tógyítáá ɔbu ɔpu amutɔ lówu.

⁴ ɔbɔpu sáásí létseí mu kle wá ntsu tsunhe pú abɔnkpabi féétó. Mú fée ɪlemlí obugya. ⁵ Inu nonuá Bulu-ɔbɔpúá ɔteki ntsusu lébláa Bulu ɔbéɛ, “Óo ɔwankípúá fúbu inu bré fée. Fú asún da ɔkpa ání fabítí amú ɪsu alɪ. ⁶ Tsúfé bamó fú ɔnású atáípu pú fú ahá, tséí amú obugya wólí ɔsulúsu. Mú sɔ fahá bapú obugya há amú fɛɛ, bunúu nɪ. ɪni lékanáa ha amú ní.” ⁷ Inu nonu ɔme kvá ɪɛdalɪ tsu afɔɪɛ-asubwi ámu asi ɔbéɛ, “Ee, anɪ Wíe Bulu Otúmípu, fú ɪsubítí igyi ɔnɔkwali, ɪɛ ɔkpa.”

⁸ Múú ɔbɔpu náásí létseí mu kle wólí owí. Mú su owí ɔnó lɔwa ɔnlun, ɪɛha mú ɪɛ ahá tɔ fé ogyá. ⁹ Owí ámu ɪɔtɔ okugyíɔku. Bulu búu túmi asun wunhe anfi féésú, táme bekiná bumɛdamlí kluntɔ; pówá mu numnyam, mboún ɪwí bɔlwí mu.

¹⁰ Onuusɪ létseí mu kle wólí ɔbwi ámu owíe obíású. ɔbwi ámu ɪwíe ogyíkpá fée ɪlokun. ɪwɛsin su mu abúɔpu amu ɔbwi amú ɔdandɔ. ¹¹ Táme bekiná bumɛdamlí kluntɔ sí amú lalahɛ amu fée bwe. Mboún bɔlwí ɔsúsú Bulu, ɪwɛsin ámúú budewúun amu su.

¹² Osiesi létseí mu kle wá ntsu yilé Efrateto. Ntsu ámu fée ilekpi lé mú ðbúntó. Ínu léla ðkpa há awieá botsú owí ðalikpa pú amú isá akópú bétalí tsun ba unv. ¹³ Inu nowun ðje laláhe asa akvá bugyi fé agyóngyo, bedali tsu bótí ámu ðnótó, ðbwi ámu ðnótó pú ðnósú ðtáipú ofunupu amu ðnótó. ¹⁴ ðje laláhe anfi bubu túmi bwé osúna akpònkpònti. Bòtsun ðsulúsu awie féesú, ménì békpa amú fée wá abato, béba bókò anì Wíe Bulu Otúmípu isá eke yilé ámúb igyi mu asún ogyíké amu.

¹⁵ Anì Wíe ðbéé, “Kì, néba fé owikplu. Bulu obóyulá ðhá aní ðleda iwísu, alalá mu atadié yáí, ménì ðméenatí yayá, péli méekítá mu.”

¹⁶ Múú ðje laláhe amu bekpa awie amu yéfia ðtinekvá butetí unv Hebrifó oblító beé, “Harmagedon.”*

¹⁷ Inu Bulu-ðòpυ síénósí létseí mu kle wá afútó. ðme kúklúkú kú ledali tsu Bulu ðswékpá unv owíe obía ámutò ðbéé, “Ílatá!” ¹⁸ Inu nyankpu lówa ibi fwí bì. Odekpíe, ðpráda ðeputí. ðme ðtsan-ðtsan lelun kúklúkú, ðsulúv lekpunkí kpunkí kvá mú odu imókúba kí tsú bréá ahá belun ðyító ðpá. ¹⁹ Wúlu yilé Babilontó léye asa. Awúlu yiléá ibv ðyító fée ilobwiebwíe. Inu Bulu lékain Babilon lakpan féesú, ðlòpυ mu obló kpònkpònti eweto-ntá ámu há mu olonu. ²⁰ ðpυ nsiné ðsulúv kugyíku lófwi, abv é fée ileja. ²¹ Atsufolibi akpònkpòntiá mú odwintó bóbwe fé kílo aduenu (50) lekpa tsú nwlóvtáasu beda ahásv. Atsufolibi amu ðnó ðnlun sv bəlwí Bulu.

17

Obu-ðnó Otsiápú Kpònkpònti Ámu

¹ Inu Bulu-ðòpυ abasiénó ámúb bekítá ablanwébi ámutò ðkule léba bebláa mì ðbéé, “Ba, ansuna fú alíá bréá

* ^{16:16} Harmagedon así gyí, Megidobu. Bókò isá tsòtsòòtsò ibv ánfisu.

Bulu óbébití obu-ónó otsiápú kponkponṭi ámbú otsie ntsu tsòtsòtsòsò ámu isu. ² Mva óyító awíe fée bató mbua. Óyító ahá fée banu mu mbuato-ntá bú.”

³ Inu Óṅé ámu léba misu, Bulu-òbòpṛu amu lótsu mí ya dimbísú. Nowun ótsi óku tsie óbwikítá-atò pépé ókusu unu. Óbwi ámu bu nwun asienó pú nsiebí idú. Bòwanlín adá ání ulòkúsú líí Bulusu dínká mu iwí fée. ⁴ Ótsi ámu lówa atadiéá igyi faasi ntsu múa pépé. Ólòwa abutó wulihé ótsan-òtsan, óde sika pépé owebi mu gyòpítò. Akisító pú mu obu-ónótsiá ifin lóbúlá mú dédéédé. ⁵ Bòwanlín idá kuá mú asi leṅaín dínká mu ósukpí bée, “Wúlu yílé Babilon, obu-ónó atsiápú fée oyín. Ósulúsu akisító fée owíe.” ⁶ Nowun ání ótsi ámu lanu Bulu ahá obugya bú. Ahá ánfí bòmò Yesu iwí adánsiégýí sò ní.

Bréá nowun mu a, ónó lobwíe mí. ⁷ Múbú Bulu-òbòpṛu amu léfité mí óbéé, “Ntogyi ónó labwíe fú ali? Néle asun ṅaínhéá lbu ótsi ámu mva óbwikítá-atò amúbú óbu nwun asienó múa nsiebí dú ámu asi súná fú. ⁸ Óbwi ámbú fowun amu latsiá kí. Ótráa óma unu séi, óbélaba. Táme imóowa ópá óbédalú tsu ulán klúklúúklú ámbú ima óka ámutò yó óhíkpa. Ósulúsu atsiápú ámbú Bulu mówanlín amú adá wá nkpa ówulú ámutò tsú bréá óyí lefi asi ámu ónó bóbwie amú, tsúfé bowun ání óbwi ámbú oletsíá, ótráa óma unu ámu lalá bá.

⁹ “Inu léhián nyánsa ání bóppnú mú asi. Nwun asienó ámu igyi abu asienó* ání ótsi ámu dé iwíe gyí músú. ¹⁰ Nwun asienó ámu ulí há awíe asienó é. Abanú bawú bòtsun, osiesi tsie obíású séi á. Osienósí mókúnýá ba. Óbá á, bré kpalobí ku pé obétsiá. ¹¹ Owíe okwesi gyí óbwi ámbú oletsíá, ótráa óma unu séi ámu. Abasiénó ámutò ókule ogyi. Mu é óbéhi fé mu aba ámu.

¹² “Nsiebí dú ámbú fowun amu igyi awíe idú ání bumókúnýá tsíá obíású. Táme béyaí amú mbíású amú iwíe

* 17:9 Abu asienó ánfísu Roma wúlu idin ní.

ogyíkpá. Amúá ɔbwi ámu bégyi iwíe bré itinbí. ¹³ Amú fée bóbwe agywun kole, pú amú túmi há ɔbwi ámu. ¹⁴ Amúá ɔbwi ámu bóko Okúfabi amu, táme Okúfabi amu obégyi amósú, tsúfé mugyí asító ɔsí pú awíeto Owíe ni. Mu abúopu gyí ahá amúb Bulu latí amú, lé amú, bubu ɔnɔkwali há mu amu.”

¹⁵ Inu Bulu-ɔbɔpu amu lébláa mi ɔbé, “Ntsu tsɔtsɔtsɔ amúú fowun áni obu-ɔnó otsiápú ámu tsie mósú ámu ilí há ɔmá-ɔmá pú oblí ɔtsan-ɔtsantɔ ahá. ¹⁶ Nsiebí dú amúú fowun ɔbwi ámu nwunso ámu é ilí há awíe idú áni mua amúnyɔ bégyi iwíe. Amú fée bólu obu-ɔnó otsiápú ámu, swí mu ató fée, lé mu yaya, wí mu aye, wá tráhe ogyá, ibóho plíplíplíplí. ¹⁷ Tsúfé Bulu lópu agywun áni wá amú fée nwuntɔ, méni bóbwe mu apé. Amú fée bópu amú túmi há ɔbwi ámu, yófun bréá Bulu asún ámu fée ibéba mótó.”

¹⁸ Inu Bulu-ɔbɔpu amu létrá bláa mi ɔbé, “ɔtsi amúú fowun atowunhe amutɔ ámu gyí wúlu yíléá ide ɔsulúsu awíe féesú gyí ni.”

18

Babilon Bwie

¹ Inu ɔma a, netrá wun Bulu-ɔbɔpu ɔku é dékplí tsú ɔsúsú ɔbá. ɔbu túmi kponkponti. Mu numnyam dewankí wólí ɔsulúsu. ² ɔlɔkplón kúklókúú ɔbé, “Babilon labwíé! Wúlu yílé Babilon labwíé! Uamlí ɔhe laláhe ɔtsan-ɔtsan fée ɔɔfínkpá. Ulabwé isia há mbubwi laláhe pú mbwíkítá-atɔ laláhe fée. ³ Tsúfé alapú mu mbuatɔ-ntá ámu dá ɔmá-ɔmá fée ɔnó. Mua ɔyítɔ awíe fée bató mbua. Ibiá agyípu fée banya iwí tsú nkpa amúú olegyi amutɔ.”

⁴ Inu nelanú ɔme ku tsú ɔsúsú ɔbé,
“Mí abí, mlile iwí le mutɔ!
Mlumáwa ibi mu lakpan ámutɔ,

méni mu asun wunhe amu ku méeba mlisu.

⁵ Tsúfé mu lakpan lawɔ nwulótáa.

Mú su Bulu lakáín mósú.

⁶ Pw mu lalahéá alapúgyí fú ahá ka mu ikó.

Pw mu bwehé ka mu ikó tsenyo-tsesa.

Ɔlopu nta kpekplé há ahá bonu.

Mú su pw múá ibu ɔnlin dɔn mú aku anyo ha mu onu.

⁷ Alagyi ɔdwe laláhe, tsú iwí dɔbi.

Mú su pw iwíɔsin múa asun wunhe ka mu ikó séi.

Ɔtebláa mu iwí ɔbéɛ,

‘Owíe tsihé ngyi, ntsie mí obíasú.

Megyí ɔsurapu ngyi, mmówa nwe ekekekeke!’

⁸ Mú su asun wunheá igyi akún, isú pú lowu bótu mu ekewóle pé.

Bówa mu ogyá, ɔbóhɔ plíplíplíplí,

tsúfé Otúmípu ani Wíe Bulu gyí. Mudé mu isu bití.”

⁹ Ɔsulósu awíe amúú mua amúnyo bɔtɔ mbua, begyi ɔdwe laláhe amu bówun mu ogyási, su kpisíi. ¹⁰ Mu ipian amúú odewúun amu ibówa amú ifú. Mú su bélú tsútsúútsú blí bee, “Gyɔwi ní! Babilon gyɔwi ní! Wúlu kponkponkponnti, nkáli su Bulu labítí fú isu ɔtsáwule pé alí?”

¹¹ Ɔyító bíá agyípú bósu, gyi awirehɔ, tsúfé ɔhaa trá ɔma unvá ɔbóhɔ amú ato fehé. ¹² Múlétsiá hɔ sika pepe pú sika futútú ató, abwi wankláán pú abutó wulihɛ, ɔhráda, ago, sríki atati pú atati pepe, nyiá ibu ɔfan, atóá bɔpu súrúfó-ise bwé, múá bɔpu nyiá ibu ibiá sré, pú múá bɔpu kóbrí múá dátɔ pú abwiá ihíé bu akíle aná féé bwé tsotsɔtsɔ tsú amú wá. ¹³ Oletsíá hɔ amú pípri, ɔhíén, ohuam, apuse, ntá, olif-nfɔ, nfúó wankláán, ayó, nnantswie, akúfa, mponkɔ, akeké, tsiá hɔ ahá nkpábi kúráá.* ¹⁴ Bósu blí bee, “Ntobí amúú fotekle amu féé ladáli fú ibi. Ató amúú fútɔpówá bite ámu féé lahóli fu. Fóméetrá wun mú ekekekeke!” ¹⁵ Bíá agyípú amúú batson musu nyá iwí ámu féé bélú ifúntó,

* 18:13 ahá nkpábi ntée anyánkpúsa-oyí múa akláa.

tsúfé bude ifú nya ání bówun mu iwɔsun ámu odu. Béki mu ipian ámu, su gyi awirehɔ! ¹⁶ Béblí beɛ, “Gyɔwi ní! Wúlu yilé, gyɔwi ní! Teki fuhíé fubu akíle. Atati fútútú múa pépe pú ago futédídá. Sika pepe ató múa abutóá ide ogyá kpa srasrasra futɔwá. ¹⁷ Atonyahé tsɔtsɔtsɔ ánti fée lahúli fu ɔtsáwule pé!”

Ntsusu-yibi akanpú, mú ahande pú mótó agyómá ayɔpú pú ibiá agyípú fée bówa ifó mu wá. ¹⁸ Ní bowun mu ogyási amu a, bɔsurá okitikíti beɛ, “Wúlu mɔmu lófɔn wúlu ánti ɔyító fée?” ¹⁹ Békpa isi wá nwuntɔ, gyi awirehɔ, blí beɛ, “Gyɔwi ní. Wúlu yilé, gyɔwi ní! Fú nyatɔ anɔ ntsusu ayibi awie fée anilanyá wi tsú. Fú iwɔsu ató fée lahí ɔtsáwule pé!”

²⁰ Ɔsúsú atsiápú fée, mlɔnya ansigyí. Bulu ahá, mu sumbí ayɔpú pú mu ɔnósú atóipú fée, mlɔnya ansigyí. Tsúfé Bulu lagyi mu asún, bíti mu isɔ, itó ámúb alapúgyí mli ámu su.

²¹ Inu Bulu-ɔbɔpu ɔwɔnlínú ɔku lótsu ibwi kɔnkpɔnti ku, tsɔwi wa ɔputɔ. Mú ɔleblí ɔbéɛ, “Alí Bulu ɔbɔpu ɔbló bwie wúlu yilé Babilon, ɔhaa méétrá wun mú ekekeke ní. ²² Ɔhaa méétrá nu ɔsankuo adapú, ulɔ awapú, ɔténɛ afulípú pú ikpe afulípú nka wúlu amɔtɔ ekekeke. Ibi ɔnó agyómá kokukoku é iméétrá tsiá unu. Buméétrá kwe nfúó unu ekekeke. ²³ Ɔkandíe kuku méétrá wankí wólí unu, ɔhaa é méétrá nu okúlu múa ɔká pɔpwe ɔme unu ekekeke. Tsúfé teki mu ibiá agyípú gyí aha kɔnkpɔnti ɔyító ní. Alapú mu atóla mlé ɔyító ahá fée, há bafwí!

²⁴ “Babilon brɔnɔsu Bulu ɔnósú atóipú amu obugya ibun. Mulómɔ Bulu ahá ɔyító fée ní.”

19

¹ Inu fée ɔma a, nonu ɔme kvá igyi fé ɔɔm ání budekplín kuklókú ɔsúsú. Budeblí beɛ, “Halelúia!” Anɔ Bulu

* 19:1 Halelúia igyi Hebrifɔ ɔblí. Mú asɔ gyí, Kanfu anɔ Wíe Bulu!

təhə ahá nkpa. Mv nkole búv túmi múa numnyam,
² tsúfě mv usubití igyi ənəkwalí, ida əkpa. Alabítí okipú
 kpənkpəənkpənti ámvú ələpυ mv obu-əno tsíá yíntá əyító
 ámv isυ, alafítě mv asúmpú obugya tsú mv wá.” ³ Bvtráa
 bυdekplón kóklókúú bεε, “Halelúia! Wúlu amv ogyási
 lakúsú yó əsúsú bré fěétó!” ⁴ Inυ ahandε advanyə-na ámv
 pú akiankparυ ana ámv bemlí bun súm Bulu ámvú otsie
 owíε obíá ámvsv, blí bεε, “Amen! Halelúia!”

Okúfabi Amv Əká Otsiáke

⁵ Inυ əmε kv lelun tsú owíε obíá ámvto əbέε, “Mlí Bulu
 asúmpúá mlitenyá mv ifú, nyebí ahandε fěé, mlíkanfv aní
 Bulu ámv!” ⁶ Mú əma a, əmε tsətsətsə lelun, fě ntsu búláhé
 détsúvən waa, ntée əpráda deputí kóklókúú əbέε, “Halelúia!
 Aní Wíε Bulu Otúmípv amv dé iwíε gyí. ⁷ Mliha anya
 ansigyí, iwí isankí aní, awa mv numnyam! Tsúfě Okúfabi
 amv əká otsiáke lafvn. Mv ka ámv lahíhíε iwí tá.” ⁸ Bεha
 mv əkpa bεε, əwáa əhráda atadiéá iləwankí, ide ogyá kpa.
 (Əhráda atadiε ánvfi ilí há Bulu ahá yiləbwe.)

⁹ Múú Bulu-əbəpυ amv lébláa mī əbέε, “Wanlun fεε, ‘Bulu
 layúlá ahá aní alatí Okúfabi amv əkátsiá nke ámv asi.’ ”
 Múú əletrá bla mī əbέε, “Asún ánvfi igyi ənəkwalí, Bulu wá
 itsú.”

¹⁰ Inυ nemlí bun mv ayabitə, mbέε ansum mv, táme
 əlebláa mī əbέε, “Mábwe! Tsúfě Bulu osúmbi ngyi fě fúa
 fú apíó ámvú mlidé Yesu iwí adánsie gyí amv. Sum Bulu
 nkole pé!

“Tsúfě ahá ámvú bυde Yesu iwí adánsie gyí amv bubu
 Bulu ənośú asúnblí əjé.”†

Əpənkə Futútúsú Ədunkápú

† 19:10 Ntée Ənəkwalí ámvú Yesu lébele əwan ámv téhá ahá
 bυtetálí blí Bulu asún ámv nυ.

¹¹ Inu múbá nówun a, ɔsúsú lafínkí. Neláki a, ɔpɔnkɔ futútú ɔku líí á! Musu ɔdinkápú amu idá gyí, “Yilé ɔbwepú pú ɔnɔkwaliyu.” Otegyi asún, ɔtɔkó isá é ɔnɔkwaliyu. ¹² Mu ansíbi aklambi igyi fé ogya plɛnplɛn. Owíepa tsɔtsɔɔtsɔ ibun mu nwun. ɔbu dá kúá bɔwanlín dínká musu, ɔhaa méyín mú tsía mutɔ. ¹³ ɔlɔwa ligá ání bɔwa mú obugyato. Mu idá gyí, “Bulu Asún.” ¹⁴ ɔsúsú isá akɔpú bɔdin mpɔnkɔ futútúsú. Bɔwa ɔhráda atadiéá ilɔwankí, ide ogyá kra bubuo mu. ¹⁵ ɔdayí iya anyɔ kláklááklá ku ledali tsu mu ɔnó. Mú ɔbɔpusáin ɔmá-ɔmá bun ni. ɔbɔpu owuntɔlun kpá amú. Bulu Otúmípu amu ɔblɔ kpɔnkpɔnti ámu ɔbɔpɔnyímé amú fé aliá bɔtenyímé wáun-abí. ¹⁶ Idá ání bɔwanlín dínká ɔhá ámúú ɔdin ɔpɔnkɔ futútú ámu atadiɛsu pú mu obiánsú gyí, “Asító ɔsí, Awíeto Owíe.”

¹⁷ Inu nowun Bulu-ɔbɔpu ɔku líí owító. ɔlɔkplón kpólí mbubwi ání buna afútó féé ɔbéé, “Mlɔba! Mlɔbefia Bulu ɔpɔnú kpɔnkpɔnti ámúú alatswi ha mli ámu asi! ¹⁸ Méni mlégyi awíe, isá ɔnɔ alípu, isá akɔpú akinkín, mpɔnkɔsu adinkápú pú amú mpɔnkɔ, ɔyító ahá, iwɛ agyípu, nkpábi, nyebí pú ahande féé aye.”

¹⁹ Inu nowun ání ɔbwikítá-atɔ amu mua ɔsolúsu awíe pú amú isá akɔpú féé bekpa aba bɔyóko ɔpɔnkɔ futútúsú ɔdinkápú amu mua mu isá akɔpú. ²⁰ Táme begyi ɔbwikítá-atɔ amusu, bekítá mua mu ɔnɔsú ɔtɔípu amúú ɔtɔbwé osúna akpɔnkpɔnti mu idátó ámu. Ofúla amu ɔlɔpumlé ahá ámúú ɔbwikítá-atɔ amu nsuhíeto din amúsú, bɔtosúm ɔkpi ámúú bɔpwe lian ɔbwi ámu ni. Bɔtswi ɔbwi ámu mua mu ɔnɔsú ɔtɔípu amu wá ogyá paati kpɔnkpɔntiá ogyá múa atonkodu ihíé detsii mútó. ²¹ ɔpɔnkɔsu ɔdinkápú amu lɔpu ɔdayí iya anyɔ ámúú ilɛdali tsu mu ɔnó ámu mɔ isá akɔpú atráhe amu féé. Mbubwi amu begyi amú aye plíplíplíplí.

20

Bowa Dbunsám Ikan Nfí Ɔpím

¹ Inu nowun ání Bulu-ɔbɔɔvɔ ɔku lékplí tsú ɔsúsú. Ɖɔɔ ilán klúklúúklúá uma ɔka sáafi pú ikan kpɔnkpɔnti ku. ² Ɖlekítá bótí, ogyi iwɔ dada amúv bɔtɔtí mu Dbunsám ntée Satan amv, ɔɔwa mu ikan nfí ɔpím-ɔkule. ³ Ɖɔtswi mu wá ilán klúklúúklú ámvɔ, fin mú, wá mú ɔnó sáafi, méni Dbunsám méetrá talí mlé ɔmá-ɔmá ámv. Nfí ɔpím ámu ɔma asa béle mu kpalobí.

⁴ Mú ɔma a, nowun awíe-mbíá ku. Ahá amúv bahá amú ɔkpa ání bégýi asún ámv bɔtsie músú. Nowun aha aku ɔkláa. Amúgyí ahá ání betun amú Yesu iwí adánsiegyí pú Bulu asún ɔkanda sú ní. Amú kén gyí ahá amúv bumotsulá súm ɔbwikítá-atɔ amv ntée mu ɔkpi ámv, bumotsulá abɔɔvɔ mu nsvhíɔtɔ dɔnka amú ɔsvkpi ntée amú ibasu ní. Bulu léha amú betsinkí, amúa Kristo begýi iwíe nfí ɔpím-ɔkule amvɔ. ⁵ Amú Bulu légyankpá kúsúá tsú afúlitɔ ní. (Awupú atráhe buméetsinkí, nkéti nfí ɔpím ámv ilatsun.) ⁶ Bulu lóyulá mu aha agyankpavv amúv ɔlɔkusúá tsu afúlitɔ amv. Amú mó á, lowu nyɔɔsi amv uma amúsú túmi. Bóbwe igýi ahapú há Bulu mva Kristo, mva amúnýo bégýi iwíe nfí ɔpím-ɔkule amv.

Satansv Gyí

⁷ Nfí ɔpím ámv ɔma a, béle Satan obu. ⁸ Ɖbédali yémlé ɔmá-ɔmá ání bubv ɔyí afunka ana, igýi Gog mva Magog amv, méni ɔbékpa ahá tsɔtsɔɔtsɔá buma ikláɔ buo iwí ya isá. ⁹ Nowun ání benatí tsun ɔyító fée, káfia Bulu ahá pú amú wúlu yiléá Bulu tekle, táme ogyá lekpa tsú ɔsúsú behi amú akɔɔpú fée plíplíplíplí. ¹⁰ Inu bɔtswi Dbunsám amúv ɔlemlé amú ámv wá obun ání ogyá mva atonkodu detsif mótó plenplenplento. Mva ɔbwikítá-atɔ amv pú mu ɔnósú atɔípú afunupv amv bétsiá iwíɔsɔntɔ ɔpa onyé bré féeétó.

Asóngyí Tráhe

¹¹ Inu nowun owíe obíá futútú kpɔ̀nkpɔ̀nti kuá ɔ̀ku tsie mósú. Nwulótáa múa ɔ̀sulúv besrí sí mu, táme bumenya ɔ̀hainkpá. ¹² Nowun awupú, nyebí ahande bulí owíe obíá ámu ansító. Bobwii nwulótó tswi. Bobwii nkpa ɔ̀sulúv ámu étó tswi. Inu bɔ̀pu tóá nwulúv ámu ileblí tsú awupú ámu bwehé wɛ gyi amú asún. ¹³ Ɔ̀pu léle awupúá bubu mutɔ̀ ba. Lowu mua afúlitɔ̀ é bele amúá bubu amótó ba. Bulu légyi okugyíɔ̀ku asún mu bwehé ɔ̀nó. ¹⁴ Inu bɔ̀tswi lowu mua afúlitɔ̀ féé wá ogyá aní itamaduntɔ̀. Inu gyí lowu nyɔ̀ɔ̀si ni. ¹⁵ Bɔ̀tswi ɔ̀hagyíɔ̀ha aní bumowun mu idá nkpa ɔ̀sulúv ámutɔ̀ é wá ogyá ámutɔ̀.

21

Ɔ̀súsú Múa Ɔ̀sulúv Pɔ̀pwe

¹ Inu nowun ɔ̀súsú múa ɔ̀sulúv pɔ̀pwe, tsúfé ɔ̀súsú múa ɔ̀sulúv gyankpapu amu itráa ma inu. Ɔ̀pu é itráa ma inu. ² Múú nowun wúlu wankíhé, igyi Yerusalem pɔ̀pwe amu, idekplí tsú Bulu wá ɔ̀súsú ibá. Bulu léhíhíe mú fé ɔ̀tsiá bawá mu ató wankláán, oyéfia mu kulu. ³ Nonu ɔ̀me kpɔ̀nkpɔ̀nti kuá ilelun tsu owíe obíá ámu asi ɔ̀béé, “Ki! Séi mú á, Bulu otsiákpá laba anyánpúsato. Obétsiá amútó, bóbwe mu ahá. Mu onutó obétsiá amútó, ɔ̀bóbwe amú Bulu. ⁴ Obétsitsií amú ntsú féé. Lowu ntée isú ntée ipian ntée ason wunhe kuku é uméetra tsiá, tsúfé ato dada amu féé ilatsun.”

⁵ Múú owíe obíású otsiápú amu léblí ɔ̀béé, “Ki, nde tógýtó bwe pɔ̀pwe.” Múú ɔ̀lelabláa mi ɔ̀béé, “Wanlun asún ánfu tswi, tsúfé mú féé ibu mótó, igyi ɔ̀nɔ̀kwali.” ⁶ Múú ɔ̀letrá bla mi ɔ̀béé “Nabwé mú féé tá. Mígyí Alfa múa Omega, Ogyankpapu múa Ɔ̀tráhe. Néha ɔ̀há aní ɔ̀mewúli de mu nkpa-ntsu, ɔ̀méeka mú ikɔ̀. ⁷ Nɔ̀pu oyúla anfi há ɔ̀há aní olegyi isu. Nóbwe mu Bulu, mu é ɔ̀bóbwe mí bí. ⁸ Táme

afúpúá beyinkí mí ɔma, ahá ání bumɔhɔ mi gyi, mbusuo abɔpú, ahá amɔpú, mbua atɔpú, ató alapú, ikpi atswépu pú afununpu fée otsiákpá gyí ogyá paati kpɔnkpɔnti, ogyá mba atonkodu ihíe detsii mútɔ. Inu gyí lowu nyɔɔsi amu nu.”

Yerusalem Bɔpwe

⁹ Inu Bulu-abɔpu abasiéno ámuɔ buɔe ablanwé asienó ámuɔ ason wunhe asienó tráhe ibɔ mú ámuɔ ɔkule léba bebláa mi ɔbée, “Ba, ansuna fú ɔtsiá Okúfabi amu ɔbá betsiá.” ¹⁰ Inu ɔlekpa mí ɔhétɔ ya ibu fúáhé kpɔnkpɔnkpɔnti kusu, olosuná mí Yerusalem wúlu wankíhéá idekplí tsú ɔsɔsú Bulu wá íbá. ¹¹ Bulu numnyam dewankí wólí wúlu ámusu, ihíe dewankí húnánááná fée atsufolibi, ide ogyá kpa fée ahuhwéá mú ansító lɔwankí. ¹² Bɔpwe buntíi trihe fúáhé ku bómlí mú, ibu aklun akpɔnkpɔnti dúanyɔ. Bulu-abɔpu dúanyɔ buɔe aklun ámu ɔnɔ gyo. Bɔwanlín Israel abusuan dúanyɔ ámu adá dínká aklun amusu ikule-kule. ¹³ Aklun asa bu owí ɔdalíkpa. Asa bu owí ɔkplíwíékpa, asa bu ɔsɔsú, asa é bu ayasi. ¹⁴ Beyi buntíi amu dínká abwi yíléyílé dúanyɔsu. Bɔwanlín Okúfabi amu sumbí ayɔpú amu adá dínká abwi ámusu ikule-kule. ¹⁵ Bulu-ɔbɔpu ámuɔ ɔde mí asún bláa amu dé sika pepe oyíá butɔpúsúsu ató. ɔbɔpúsúsu wúlu amu, mú abuntíi pú aklun ání ilobomlí mú fée. ¹⁶ Wúlu amu swító pú mú teító fée igyi kékée. Bréá olosusúu mú á, mú swító, mú teító pú mú fúátó fée igyi máli ɔpím-ɔkule lafana (1,400). ¹⁷ Inu olosusúu buntíi amu trító é. Igyi ayabi lafanyɔ mba dúasie (216), nyankpusa atosusúhe ɔnɔ. ¹⁸ Abwiá igyi fée ahuhwé bɔpupwé abuntíi amu. Bɔpu sika pepeá tɔtɔ mefráa mú, igyi fée gláasi pwé wúlu amu. ¹⁹ Bɔpu abwiá ibu bíá ɔtsan-ɔtsan dúanyɔ wá abuntíi amu ntswasi. Abwi ámu adá gyí, yaspá, safiri, agate, emerad. ²⁰ Onik, kanelia, krisolit, beril, topas, krisopas, yasint pú ametiste. ²¹ Abutó wulhe fútútú wankláán dúanyɔ bɔpubwé aklun amu. Iklun amu

kugyíku igyi butóbi fútútú kule. Sika pepeá tətə mefráa mú, igyi fé gláasi bəpəwá abəonu wúlu amutə. Fétalí ki tsun mótó.

²² Mmowun Bulu ətswékpa koku wúlu amutə, tsúfé Bulu Otúmípu amu mva Okúfabi amu gyí Bulu ətswékpa unv. ²³ Wúlu amu imehián owí ntée ətšra wankí mótó, tsúfé Bulu numnyam təwánkí há mú, Okúfabi amu é gyí mú əkandíe. ²⁴ Ɖamá-əamá bənati wúlu amu wankitə. Ɖyítə awíe é bəpu amú numnyam ba mótó. ²⁵ Bvméefin mú ətš aklon, tsúfé oklún ma unv. ²⁶ Ɖamá féé bəpu amú numnyam pú amú obú ba mú. ²⁷ Tógyítá mú iwí metin, mbusuo abəpú ntée afunupu bvmóowie wúlu amutə, nkéti ahá amú bəwanlín amú adá wá Okúfabi amu nkpa ətswlótó amu nkule.

22

Nkpa-ntsu Tsonhe

¹ Inu Bulu-əbəpu amu losuná mí nkpa-ntsu amú uləwankí fé ahuhwé ámu. Idetsúun tsu Bulu mva Okúfabi amu owíe obía amutə. ² Ntsu ámu ina bəonu yiléa ida wúlu amu nsiné. Nkpa-oyí ulú ntsu ámu agbemgbe anyə ámusu, itoswíe abí ətšan-ətšan ətšragyítšra. Itoswíe tsé dúanyə ofi əkuletə. Mú afitáa é igyi afá há əamá féétó ahá. ³ Tógyítá Bulu lalwí mú méetsiá wúlu amutə.

Mboún Bulu mva Okúfabi amu owíe obía obétsiá unv, mu asúmpú bósum mv. ⁴ Bówun mv ansító, mv idá é bédunká amú ətšukpi. ⁵ Owí méetrá ta unv ekekeke. Bvméetrá hián əkandíe ntée owí, tsúfé aní Wíe Bulu ətšwankí wúlí amúsú. Bégyi iwíe bré féé.

Yesu Iba

⁶ Inu Bulu-əbəpu amu lébláa mi əbée, “Asún ánfí bu mótó, igyi ətəkwalí. Aní Wíe Bulu télé tóá ibéba suná mu ətšósú atáipú. Muláwá mu ətəpu əbée, əbéle tóá ibéba nke ánfítə suna mv asúmpú.”

⁷ “Κι! Ιμώowa οπά néba! Ωωλύ άνfito asún béba mító. Mú so Bulu obóyulá ohá ání olegyi mú féésú!”

⁸ Μί Yohane lónu asún άνfi, nowun mú féé. Bréá nonu asún άνfi, nowun ató άmv é á, nemlí bun Bulu-ωωpu amúó olee mú suná mí άmv ayabito, mbéε ansum mv.

⁹ Táme oletrá bláa mi oβée, “Mábwe! Tsúfé Bulu osúmbi ngyi fé fúa fú apió Bulu onósú atóipú, pú ahá amúó bégyi asún amúó bōwanlín wá ωωλύ άνfito άmvsu. Sum Bulu nkule!” ¹⁰ Múó oleebláa mí oβée, “Mápu ato lesúnáhé anfi ηgáín, tsúfé mú bábi lafun ta. ¹¹ Ha lalahe ωwepú oyo mv lalahebwev. Ifinto otsiápú otsía mv ifinto, yilé ωwepú é okita mv yilébweto. Ohá ání oβée, mópu mv iwí há Bulu osí mv iwí ha Bulu.”

¹² Iwu Yesu lébláa mi oβée, “Κι, ιμώowa οπά néba! Nebá iko okakpá. Néka ohagyíoha iko mv bwéhé onó. ¹³ Mígyí Alfa múa Omega. Ogyankpavu mva Otráhe, asi Otsuápu pú onó Omópú.

¹⁴ “Bulu obóyulá ahá ání bude amú atadie fwi, ménu bétalí nyá okpa tson wúlu yilé amúó íbá άmv onó wíé mító yégyi nkpa-oyí άmv abí. ¹⁵ Akíai obésin iban άmv oma. Amú gyí; ató alapú, mbva atópú, ahá amópú, ikpi atswépu pú ahá ání butekle afunu, butowá mú é féé.

¹⁶ “Μί Yesu láwá mí ωωpu mbéε, oβá bebláa fu asún άνfi, afupubla Akristofó oπasua άmv féé. Mígyí Owíe Dawid mv na, mv ató ogyípú pú Bake Otsrakpabi wankíhé amu ni.”

¹⁷ Iwu Bulu Oηé άmv pú oká pōpwe amv beblí beε, “Ba!”
Ohagyíoha ání onú asún άνfi oblí oβée, “Ba!”

Ohagyíoha ání omewóli de mv oβá. Ohagyíoha ání odeklé oβá, Bulu okie mv nkpa-ntsu άmv.

Itráhe

¹⁸ Μί Yohane, nde ohagyíoha olá da kpákpáákpá. Mbéε, ní okv lónu ato lesúnáhé ωωλύ άνfito asún, oωpu kv tsía mító á, Bulu é oβéha asun wunheá íbv ωωλύ άνfito íbéba

musu. ¹⁹ Ní oku é léle tǎku tsú ɔwɔlɔ́ ánfɛtɔ́ á, múmó Bulu é ɔbéle mu ogyíkpá ání ibu nkpa-oyí ámu pú wúlu wankíhé amúú nɔwanlín mú iwɛ asún wá ɔwɔlɔ́ ánfɛtɔ́ ámɔtɔ́.

²⁰ Ɔhá ámúú ɔde ntobí ánfɛ iwɛ adánsɛ gyí ɔnɔkwálɛsu ámu ɔbéɛ, “Ee! Imóɔwa ɔpá néba!”

Amen! Owíe Yesu, ba!

²¹ Aní Wíe Yesu ogyíi Bulu ahá bɔale!

Bulu ntam pɔpwe; Nkonya
New Testament in Nkonya (GH:nko:Nkonya)

copyright © 2010 Wycliffe Bible Translators, Inc.

Language: Nkonya

Translation by: Wycliffe Bible Translators, Inc.

Nkonya

nko

Ghana

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nkonya

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 13 Mar 2019 from source files dated 13 Mar 2019

01b09958-fa53-51d1-aae0-88c7e9302503